



古今游名山記卷之五

括蒼何鏜振卿甫編輯

廬陵吳炳用晦甫校正

東嶽泰山 山東諸山泉附

**總敘**按泰山五嶽之東嶽也博物志云泰山一曰天孫言為天帝

孫也主召魂東方萬物始成故知人生命之長短五經通義云一曰岱

宗言王者受命易姓報功告成必於岱宗也東方萬物始交代之處宗

長也言為羣嶽之長白虎通云王者受命必封禪封者增高也禪者廣

厚也皆刻石紀號著已之功績以自効也天以高為尊地以厚為德故

增泰山之高以示報天禪梁甫之陟以示報地漢官儀及泰山記云盤

道屈曲而上凡五十餘盤經小天門大天門仰視天門如從穴中視天

窓矣自下至古封禪處凡四十里山頂西巖為仙人石間東巖為介丘

東南巖名日觀日觀者鷄一鳴時見日始欲出長三丈所又東南名秦

觀秦觀者望見長安吳觀者望見會稽周觀者望見齊黃河去泰山二

百餘里於祠所瞻黃河如帶若在山陞山南有廟悉種栢千株大者十五六圍相傳云漢武所種小天門有秦時五大夫松見在初學記

**漢光武東封泰山記**維建武三十有二年一月皇帝東巡狩至于岱宗

柴望秩于山川徧于羣神遂覲東后從臣大尉熹行司徒事特進高密侯禹等漢賓二王之後在位孔子之後襄城侯序在后藩王十二咸來助祭昔在帝堯聰明密微讓與舜庶後裔握機王莽以舅后之家三司鼎足冢宰之權勢依託周公霍光輔幼歸政之義遂以篡叛借號自立宗廟隳壞社稷喪亡不得血食十有八年揚徐青三州首亂兵革橫行延及荊州豪傑并兼百里屯聚往往僭號北夷作寇千里無煙無鷄鳴犬吠之聲皇天睠顧皇帝以匹庶受命中興年二十八載興兵以次誅討十有餘年罪人斯得黎庶得居爾田安爾宅書同文車同軌人同倫舟輿所通人迹所至靡不貢職建明堂立辟雍起靈臺設庠序同律度量衡修五禮五玉三帛二生一死贊吏各修職復于舊典在位三十有二年年六十二乾乾日昃不敢荒寧涉危歷險親巡黎元恭肅神祇惠恤耆老理庶遵古聰允明知皇帝唯慎河圖維書正文是月辛卯柴登封泰山甲午禪于梁陰以承靈瑞以為兆民永茲一字垂于後昆百僚從臣郡守師生咸蒙祉福永永無極

**宋洪邁秦山錄**應劭漢官儀載建武封禪事每稱天子為國家其敘山勢峭險登陟勞困之狀極工予喜誦之其畧云是朝上山騎行往往道峻峭下騎步牽馬乍步乍騎且相半至中觀留馬仰望天關如從谷底仰觀抗峯其為高也如視浮雲其峻也石壁窅窅如無道徑遙望其人端端如行朽兀或為白石或如雪久之白者移過樹乃知是人也殊不可上四布僵卧石上亦賴齋酒脯處處有泉水復勉強相將行到天關自謂已至也問道中人言尚十餘里其道旁山脅仰視巖石松樹鬱鬱蒼蒼若在雲中俛視谿谷碌碌不可見丈尺直上七里賴其羊腸逶迤名曰環道往往縲索可得而登也兩從者扶掖前人相牽後人見前人履底前人見後人頂如畫重累人初上此道行十餘步一休稍疲咽唇焦五六步一休蹠蹠遽頓地不避燥濕前有燥地目視而兩脚不通又

郭相判

云封畢詔百官以次下國家隨後明日太醫令問起居國家云昨上下山欲行迫前人欲休則後人所蹈道峻危險國家不勞又云東山名曰日觀鷄一鳴時見日欲出三丈所秦觀者望見長安吳觀者望見會稽周觀者望見嵩山凡設文之士悉如此而未嘗見稱於昔賢秦吳周三觀亦無曾用之者今應劭書脫畧惟劉昭補注東漢志僅有之亦非全篇也

**宋邵伯溫泰山錄**客云昔罷交曹與一二友祀岱嶽因登絕頂四十里宿野人之廬前有藥窰地多鬼箭天麻玄參之類將五鼓初各仗策而東僅一二里至太平頂叢木中有真宗東封壇遺址擁褐而坐以伺日出久之星斗漸稀東望如平地天際已明其下則暗又久之明處有山峻峯如卧牛車蓋之狀星斗盡不見其下尚暗初意日當自明處出又久之自大暗中日輪湧出正紅色騰起數十丈半至明處却半有光全至明處却全有光其下亦尚暗日漸高漸變色度五鼓三四點也經真廟帳宿之地石上方柱竅甚多又經龍口泉大石有罅如龍哆其口水

自中出又經天門十八盤峯尤秀聳北眺青齊諸山可指數信天下偉觀也

**宋錢伯言游泰嶽祠記**宣和己亥九月二十四日面奉玉音至奉符催視嶽祠後一月伯言至自究明日具香燭以告上旨已而罷醮于會真宮獨登瑞雲亭早飯于行館遂同令寇庠丞呂光問祠官曹欽承萊蕪令韓僖謁岱嶽觀留連池上復自金母洞過青帝觀觀文僖丞相遺刻遂遊白龍潭奠御苑玉芽於水中愛其泉石之勝迺相與策杖散步還過雞籠峯始復肩輿躬走社首山視禪壇訪遺迹晚入乾元觀小飯翠陰亭而歸

**明李裕登泰山記**成化乙酉春同年御史李景賢來按山東是歲三月朔同自濟南往謁闕里回抵泰州公館夜酌景賢曰喜茲和煦明當同登泰山一覽奇勝可乎余諾之明晨起與景賢聯騎出州城北望輕煙薄靄橫帶山腰適叅政葉拱宸副使莊尚源邂逅而至遂與偕往北行二里過白鶴泉泉出石罅淅淅沸久旱則滲漉距西百餘步曰梳洗

樓不知於何時惟存故址從西折北二里有王母池泉其而洌瀟沸  
潏瀟不竭不溢鄉人取水崇雨頗驗又北五十餘步曰呂巖有呂仙石  
像宋時建樓閣堙圯獨荒基破礎存今園以石垣其中深林茂草森布  
蒙密曄曄猗猗頗有佳致至山麓時日出扶桑雲霞絢綵目前羣峯錯  
立遠近異態景物之奇似快心意自山麓抵迴馬嶺十餘里羣峯對峙  
巖嶂崢嶸勢相噬齧中夾溪流轉騰激洌觸崖石激堆琦其聲澎湃濤  
濤泆泆縈迂數里入汶又有巨石大者如輪小者如甕硤硤礪礪偃卧  
路徑難以數計策馬單行崎嶇至嶺下是嶺岌業陡絕車騎不可前馳  
余四人神思覺疲僕從亦有倦色少憇石上飲茗易肩輿穿深林踰大  
石行可四里陡崖剝削中夾石徑阨陀險阨有石磴可躋復行二里許  
卽宋眞宗東封帳宿處曰御幃其地夷衍嘉木檉椽繁陰布地前卽深  
澗黛蓄膏渟水光映天巉石錯雜如斷齶有小魚色青黑浮遊水面臨  
溪觀之時羅道士獻茶餅余試以餅餌之翕然聚已而尙源投以小石  
悉潛去復三里餘至黃現山秦時有松五株始皇登山封五大夫枯沒

後人續植者百有餘年老幹拳曲擁腫宛若蒼龍勢欲飛騰余四人休  
憇其下嗟賞奇態又行二百餘步曰百丈崖崖仄如屋可容十餘人臨  
瞰道傍紫蔓青蘿搖綴蒙絡傍有石洞豁訝而黑莫測深廣人亦憚憚  
不敢窺又經石壁峪至十八盤兩峯對插峭削如壁其間累石爲徑盤  
繞至南天門幾五里遠望如梯懸倚山畔此最險絕易小轎盤道而上  
入天門東行數里詣昭眞觀易冠服薦祀紫霞元君問道士云不知創  
始每歲春月四方謁者踵至心弗虔立致奇報余聞而驗之數矣已卽  
祠後觀磨崖碑是碑唐玄宗紀泰山銘字大如手歲久風雨多剝蝕其  
字距東十數步觀始皇封山制李斯所篆其石埋植土中高五尺形制  
似方非方四面廣狹不等余刮磨垢蝕而細觀之總二十二行行各十  
二字多不可識又西行數步上太平頂此泰山最高處上有磐石方丈  
廉隅尚整鰓色光潤可愛余四人坐石上少頃拱宸尙源足疲怯還昭  
眞觀余與景賢褰裳徑往頂上俛瞰羣峯攢簇伏地若培塿獨神霄兩  
峯巖嶭特起佳花異草含丹吐白者駢羅列布於岩谷靈禽怪獸啾鳴

嘯號之聲雜沓盈耳最爲泰山奇勝又有三峯曰日觀吳觀周觀余與景賢因縱目四顧渺然無極而崧華恒霍諸山以及江漢河濟諸水皆可指數誠天下諸山莫踰其高時日正午風清氣爽徘徊旣久頓覺神思飄灑迥隔塵寰而不知身踞青霄上也復從頂東下數十步有玉女泉水清甘美道士時汲淪茗又東行二十步曰龍口泉大石有罅如龍哆其口水自中出其流淪淪有聲潑然復從險徑南行四十步懸崖峽崕下臨絕壑古木蒙蔽余俯身覘之毛髮豎聳有怪石形如大匱虛倚崖畔風至搖撼問道士云此謂捨身崖人修道從茲捨身入僊境余與景賢深惻道士惑世者戕人之生遂命州官塞路徑絕往來崖之西有五峯嶙峋巉簇其狀若蓮名蓮花峯自西山小山折旋而東層嶂疊出泉湧石上奔瀉數十丈縷縷如簾名水簾泉其鷄籠諸峯桃花諸峪多有靈跡奇勝獨嶺嶠龍從岩壑帶嶠嶠荆秦交迷路徑不可到時日過未余與景賢往觀會二公同飲各賦詩二首書于觀之東壁從天門盤舊道而下至半嶺正夕陽西照回視山色玲瓏水光蕩漾樵翁牧子隱隱樹林間恍若畫圖中人物欲乘餘興往徂徠尋竹溪六逸堂故基石守道隱居日已暮矣嗟夫余少時嘗讀孟氏書孔子登泰山而小天下公羊傳泰山之雲不崇朝而雨徧天下觀子美望岳詩造化鍾神秀陰陽割昏曉盪胸生層雲決眚入歸鳥之句想像泰山之高峻巒峯之雄秀草木之奇妍仙蹤靈跡之怪異古今賢人達士登覽之題咏何能得登茲山窮探廣索親覽奇勝徒縈諸夢想者十餘年矣昔程明道幼聞泰山奇秀在鄆縣未得遊覽及登第請爲是縣主簿以償其素願又自記其始末今余無庸於時幸叨總憲是邦且喜聖德廣被地方居民咸蒙覆露之庇更喜諸公皆同朝舊寮乘茲休暇得覽奇勝以償夙昔之願何其幸歎是亦張弛之道豈其荒耽而忘返者足比哉

**明喬宇游泰山記**

正德五年燕齊大旱運河滯阻天子爰舉祈方之典

命戶部侍郎臣宇於五月十四日往東方祭告嶽鎮暨于東海予夙願泰山一登又懼此行以昭假明神周救百姓而徃苟祀而無雨則又不

可登矣因齋心而前過德州卽沛然下雨過平原禹城泰安州濟南之境雨皆達旦農夫歡踴予亦展顏謂可以償其願矣二十九日沐浴更明衣省牲演禮于季夏朔鷄鳴後致祭于東嶽廟畢祭時雷電合作予又懼曰秦漢以前登封泰山者七十二家實爲靈墟著于簡冊雖始皇以虎狼之威千騎萬乘以從上中阪遇暴風雨不得上封今且雷電矣登而雨作疲夫羸馬不得登矣但頗自謂秉誠肅恭嶽豈無鑒耶竟與胡張二君同登時陰霾蔽空行五里余至紅門以入則雲漸開朗遂由石陂西北行二十里過嶺二曰回馬黃現又五里至御帳觀始皇所休樹五大夫松神根古幹高皆二丈許自御帳而上皆石磴飯訖上小大龍口又盤曲十五里至南天門又三里至絕頂凡五十盤而上晴晦開闔氣候萬態不可云狀謁禱于碧霞元君稍上是爲東嶽廟磨崖碑在焉碑高二丈廣一丈五尺其文乃唐玄宗御製泰山銘其書隸其立之年爲天寶遂題名于上又上爲極高處有玉皇殿殿南爲始皇封禪碑卽除道至山顛覽秦頌功德碑碑高二丈許其文秘石套內殿中有宋真宗石匣內藏玉檢十六成化間曾入御覽驗爲祀泰山后土文也再東爲日觀峯有小碑亦刻名焉數步許爲望海石是爲越觀可望會稽石在頂巋然躡躄愛而登之爲題望海石三大字又轉登仙人橋五花嶺是時天日光麗碧漢萬里豁然四望胸恢意廣見濟南城東北華不注山如小屋建于水上俯觀白雲英英縹緲自山腰而出冒于下方北望京師南瞰淮徐西顧燕趙東眺海上以至于空峒丹穴太平太蒙之際誠天下之奇觀也飯于道院又題名篆詩于小石碑徘徊至晚方回遇崖石可愛者輒留書下山至州城則已報更矣

明倫彙編 禮儀典 禮儀典 游泰山記

成化丙午春藩臬將巡行郡邑余與少叅王君世用

憲僉劉君廷珪潘君應昌約日偕行乃以正月丁卯發濟南戊辰抵泰安州庚午黎明詣草叅亭拜東嶽祠遂肩輿出城北行五里及泰山之麓由紅門路過高老橋傍有水簾洞洞左爲巖巖亭少憇經馬棚崖回馬嶺路漸陟峻再行至黃峴嶺陟嶺東下徑路平坦俗謂之快活三延轉而上及御帳蓋宋真宗駐蹕之所蜿蜒而上歷十八盤至南天門東

北行二里及昭真宮謁碧霞元君由宮後稍北有東嶽神祠祠陰刻唐開元磨崖碑遂上登封臺有玉帝殿前建石表高丈餘或云秦之無字碑復轉東南至日觀峯捨身崖在峯之下西望則有月觀秦觀諸峯北望則有獅鴉鶻二崖若西南之丈人峯東南之徂徠山尤其秀拔其青嵐鴈飛二嶺馬蹄桃花二嶂與東西二神霄山大小二懸石蛻仙巖明月嶂龜陰埠楊老園皆在指顧間而下瞰汶泮二河如拖練耳人云秋氣晴肅可以見海余與世用廷珪應昌酌昭真宮之別室再酌於巖巖亭酒力微醺夕陽欲墜神思飛爽飄然跨滄溟凌宇宙之氣槩也山下有呂巖洞王母池白鶴泉則以薄晚不能及其他峯崖林壑幽邃之地佳景尙多不能悉記辛未出城西門禮玉女殿卽宋天書觀遂至蒿里山探鬼仙洞令道士執燭以往陰氣侵人不可深入時諸君各有事於東西乃布席張樂爲別

**明高誨游泰山記**泰山在州治北高四萬餘尺延袤幾二百里名峯七十有二其嶺岼列巘森然而拱秀者弗可勝紀古爲東鎮天下之山莫

高焉予往歲登謁時甚寒未獲盡觀奇勝爲恨嘉靖壬午冬予承臺檄督佾宗事癸未三月六日肩輿出北城門踰小橋二里道左右亂石碁布近麓有廟祀池館俱壯麗左有老栢數株相傳漢武帝東封時植也又二里至紅門跨道爲飛雲閣道傍爲更衣亭楔扁曰宗嶽循溪產天麻黃精諸藥又五里至高老橋有漢壽亭侯祠前桃李始華稍前爲水簾洞泉自天紳巖出飛流垂練聽之泠泠然下有小石橋通泉于溪左爲巖巖亭登之畢見景物又四里至馬棚崖稍前爲回馬嶺山石漸峻且奇林木亦幽邃溪崖有椒有梅杏櫻桃山居者資以爲利又五里至黃峴嶺西行折東北上而復下又西行折東北則下而復上雖盤曲下上率坦易凡三以里計亦三遊人疲于峻陟至是舒快名曰快活三

**西巖**有竹繁茂又五里至御帳宋眞宗駐蹕之所五松高數丈秦皇避雨其下封大夫云竹林僧獻茶問之曰東巖所產味亦清苦又五里至大小龍口兩山懸削水從石峽噴瀉上有古松偃仰若蟠虬然又五里至十八盤崖間楸榭野棠山榴彌桃或花或實石磴齒齒倚空仰



視似有不可至者乃僂僕攀援以上盤盡至峽口高處石門題曰南天門有三靈廟又東北二里爲元君祠左側石方池曰王女泉一名聖水其寒清冽汲以烹茗可比浮槎龍泉又東北至嶽神祠祠後有唐磨崖碑二一爲開元紀泰山銘一爲乾封朝覲頌側多古人題詠鮮蝕不可讀又北上至絕頂有玉帝祠祠前石表丈餘一名秦王無字碑又東南行至日觀峯人云鷄鳴時見日出有石函方丈許人云成化間雨水衝決得王檢以獻命中使瘞舊所卽此峯之西巍然而突出者秦觀峯也稍南而獨見者越觀峯也峯之下壁立萬仞者捨身崖也崖之右則試心石仙人橋也延竚四望滄溟東坵河流天傾而汶水湯湯祇環一綫西南萬山伏地殆如米撮惟徂徠尼父僅露脊可指耳近顧諸峯若丈人若囿鴈若蓮花若明月若東西神霄雲烟相盪勢若爭雄其不能以一峯名而附之以見者如拱如揖凜然有夔夔聽命之狀真奇觀也予始至瘦石嶙峋剛風怒濤溪竹崖松宜雪宜月其充足聽聞者樵斧之聲與崆峒應答旣而鳥鳴花麗萬谷皆春泉香可啜蔬美可饌山容于

是乎忻忻然而人亦得以樂之至於溪雲出沒而陰晴變化于立談之頃此又造物者之翕張而莫知其所以然也夫山之景象奇于春而遊人或拘于時止于暫予公事久于斯而又頻于上下則夫山之情狀景之變態古人遊豫登眺之迹靡不襲其芳而踵之茲遊也可不謂獨勝乎

**明陳沂泰山考**泰山在泰安州北東方之嶽也一曰岱宗又曰交鎮周禮職方河東曰兗州其山鎮曰岱山書曰二月東巡狩至於岱宗五經通義云王者受命易姓報功告成必於岱宗東方萬物始交之處宗長也言爲羣嶽之長詩曰泰山巖巖魯邦所瞻博物志云一曰天孫言爲天帝孫也主召魂東方萬物始成故知人生命之長短白虎通云王者受命必封禪封者增高也禪者廣厚也皆刻石紀號著已之功績以自效也天以高爲尊地以厚爲德故增泰山之高以示報天禪梁甫之吐以報地漢官儀及泰山記云盤道屈曲而上凡五十餘盤經小天門大天門仰視天門如從穴中視天窻矣自下至古封禪處凡四十里山頂

西巖爲仙人石間東巖爲介丘東南峯名曰觀鷄鳴時見日始欲出長  
三丈所又東南名秦觀可望長安秦李斯碑篆毀僅存數字吳觀者可  
望會稽周觀者望見齊黃河去泰山二百餘里於祠所瞻黃河如帶若  
在山趾蓋侈言也又云山南有廟悉種栢千株大者十五六圍相傳云  
漢武所種今所餘無幾小天門有秦五大夫松尚存嶽頂有秦無字碑  
人云內有字蓋謫之也斲崖數丈唐開元紀泰山銘隸書大四寸乾封  
年登封文在其右字寸許類聖教序集右軍書爲近時閩人蓋以忠孝  
節義四大書盡鑿毀見者痛惜山有丈人獨秀鷄籠老雅獅子蓮花懸  
石諸峯百丈捨身馬棚鵠諸崖石經石壁佛寺鬼椒子酆都桃花馬  
蹄溪里諸峪迴馬鴈飛黃現思鄉青峯西橫諸嶺牛心龍口試劍龍紋  
虎阜諸石迎陽呂公白雲遙觀思仙諸峒玉女王母白鶴白龍水簾諸  
池又有明月嶂登仙臺下有東西中三溪有云云亭亭梁甫社首肅然  
萬里諸山皆先代所禪者上有嶽廟碧霞仙女祠四方之乞靈者歲無  
虛日所施牛羊馬金綺錢帛甚多有司掌之歲數萬金山東之財用實

資焉

宋張

泰山

西北

趾羣山

擁翼連屬

百餘里

摩空干雲秀

拔萬狀

曲如列屏削如立壁矗如攢劍銳如植圭幃幌掩映城堡環遶  
虎兕奔突龍蛇盤屈峯爲靈谷呀爲洞穴斷爲谿澗引爲林麓峯卓嶺  
聳巒跳巘疊翠木蔭蔚飛泉激越中有川焉厥土衍沃齊魯通道出于  
其間左一山特起曰鷄鳴緣北麓絕澗循峪口上東北二十里險盡地  
平山勢圍抱四面峭絕如堵墻蒼崖之下緝殿崛起峻塔貫雲寶樓結  
瑤高門嵯峨長廊連延遠而望若畫圖卽寺也按圖經本希有佛出現  
之地後魏正光年法定師始置寺有青蛇白兔雙鶴二虎之異我朝景  
德錫今額先是率意締構因地任材景祐中主僧瓊環者卽衆堂東架  
殿兩層龜首四出南嚮安觀音像文楣藻拱頰極精麗設簷刻鯨以警  
昏曉後復置殿之兩楹闢正門疊石填澗爲回廊庭除顯敞乃爲大壯  
寺有石三門千佛殿與釋迦殿辟支佛塔皆古制塔西長松狀若偃蓋  
背一峯聳起百丈比墜正方青壁削成如辣羯玉半有石龕金容儼然

西尖峯可登下視深谷千仞前有洞東西南三門相通中設羅漢像西  
南望一山壁穴如車輪午晴日在南飛光透徹講堂東石壁下一泉曰  
錫杖又東西五步二泉惟白鶴泉見又東北二百步一泉曰甘露門西  
百步一泉曰黃龍皆爲絕景神宗章聖錫御書琅函鳳篆輝映巖谷  
皇上復降御篆飛白爲賜寺之殿堂廊廡廚庫僧房間總五百四十東  
北崖上平處古堂殿基宛然石柱礎鐵像下體尚存蓋法定始置于此  
處後來者遷之也今屋其上僧之講習者居之川中有一易之田十夫  
屋千楹歲租月僦以足經費唐相李吉甫纂十道圖以潤之棲霞台之  
國清荆之王泉合茲寺爲四絕慶曆三年予爲長清尉寺居封內周覽  
絕景不知屬厭餘三則未之見也

**明喬宇游靈巖寺記**觀趵突泉畢東行飯于長清之故山舖又三十里  
憇遲賢亭壁間有靳八公之像與書又三十里日已西至靈巖寺卽佛  
圖浴卓錫之地在方山上山四面方正故名齊乘云疑卽水經之玉符  
山也入則周覽殿堽丹青煥炳今碑古刻紛列右左殿後觀井露泉一

名白露清淨靜菴復捫蘿峻登而上有崖俯垂名曰大石棚如崩如劈  
遂題名于崖間寺周山場種椒數十里以給又有鉅竹參空雜植庭舍  
翠色逼人清蔚可愛自北魏歷隋唐以來世崇代蔓故今居僧多至千  
人薨連棟接隨山高下幽軒爽觀香疏經室盈被澗谷江北梵刹莫之  
或先在釋氏所謂四絕之一誠然不虛夜于僧房浴而宿明日又遍搜  
碑刻之未覽者有覺懷英隸書碑一頗覺迥別山半有巨塔亭亭霞表  
乃元祐年所建留詩于第一層壁上又觀卓錫泉泉在寺東石崖下  
常潔而盈引流于僧屋日取資焉又觀雙鶴泉各爲泉篆于崖間山之  
泉有六其黃龍獨孤石龜三泉尚不知其處大抵寺大而境多必窮數  
日之力乃可遍覽予也肅將公事安敢放游而畢予之興耶

**姚奎游石屋記**泰山東數里許有石屋世傳碧霞元君煉真之所予公  
暇欲往觀焉從者曰徑隘不可輿迺易服命道士爲前導行三四里無  
復蹊徑披蒙茸攀巉巖偃僂而上愈進愈險下瞰嶺崖驚汗浹背又三  
里盤旋轉一岡而石屋在望矣有羽士迂于青松絕壑間前牽後擁迺

獲躋焉瞠目縱眺上有削鐵奇峯千朵前有夷地可半畝入其中窈然而深朗然而虛明石竇涓涓凝結玉柱大十圍高丈餘晶瑩可鑒崖有元君手印玉指宛然後有石床則元君偃息處左偏一竅透絕頂頂有石樓可坐三四人水滑不能升躋攀數蹬而下力疲卧石床毛骨灑灑旁有聖水池清冽而其不盈不涸下有石曰牛心甚奇怪又下有洗鶴灣深不可測一鶴鳴于上似與人聲相應和實真仙境也人之遊泰山者每以道左日窮爲畫於斯罕到孰知石屋之多奇迺爾哉

元張養浩游龍洞山記 綽然亭西四三里有雙山 各廣四十畝童無

樹林東西並峙皆青山疊嶂勢陂陀可步而上按圖輿經無其名蓋土人以旁無他山惟此若標可鑿故以名之其上有洞如屋可避風雨始登若小勞旣戾其上神超氣逸身欲羽飛環視衆山手若可卽其巖巖屬巘盛於東南而微殺於西北諸支流之水縈絡交碧練橫繩引析而復合蓋郊外可登眺者莫此勝焉嘗欲構亭其上時杖履往來因仍未暇旣而坐洞屋中出觴更酌詠古人閑適之詩其清歡雅思悠然而集身世兩忘加以煙嵐分湧相與冥合昏乎不知余之爲山而山之爲余也

元張養浩游龍洞山記 歷下多名山水龍洞爲尤勝洞距城東南三十

里舊名禹登山按九域志禹治水至其上故云中有潭時出雲氣旱禱輒雨勝國嘗封其神爲靈惠公其前層峯雲矗曰錦屏曰獨秀曰三秀有僧居之繇錦屏抵佛刹山境巖環合飛鳥劣及其半稍西卽山有龕屋深廣可容十數人周鑄佛像逃亂者多此焉依上下有二穴下者居旁可迤透東出其曰龍洞卽此穴也望之窅然竊欲偕同來數人入觀卽遣僕然束艾前導初焉若高闊可步未幾俯首焉未幾磬折焉又未幾膝行焉又未幾則蒲伏焉又未幾則全體覆地蛇進焉會所導火滅煙鬱勃滿洞中欲退身不容引進則其前愈陘且重以煙燧械吻抑鼻潛息心駭亂恐甚自謂命當盡死此不復能出矣余強呼使疾進衆以力奮身若魚縱焉者始獲脫然以出旣出有泣者恚者詬者相譏笑者

頓足悔者提肩喘者喜幸加手其額者免冠科首具陳其狼狽狀者惟導者一人年稚瘠小先出若無所苦見衆皆病亦佯懾爲戲諸宴外者卽舉酒酌穴者人一二杯雖雅不酒必使之醺名曰定心飲余因憶昔韓文公登華山窮絕頂梗不能返號咷連日聞者爲白縣吏遂遣人下之嘗疑許事未必有以吾數人觀之則韓文公之號爲非妄矣於戲不登高不臨深前聖之訓較然而吾輩爲細娛使父母遺體幾同壓溺不弔其爲戒詎止辱身不可忘竊虞後來者或不知誤及此故紀其事以告焉

**元劉美之鄒嶧山記**嶧之爲山雖非名嶽巨鎮其洞府玲瓏巖竇崎峭千態萬狀他山之秀未必可與並焉道家所謂洞天此非其一歟頃導江張先生題嶧山詩云淮堧有葛繹其陽孤桐生地里殊迥隔山名難混并蓋謂此山去今徐地遠非禹貢所載嶧陽孤桐之山也竊嘗考之書曰海岱及淮惟徐州詩閔宮云保有鳧繹奄有龜蒙遂荒徐宅春秋文公十三年杜預注云嶧山在鄒縣北今山之西南有村曰故縣疑其爲古鄒縣也唐杜祐通典云故鄒國城在縣東南周圍四十里上冠峯巒下屬巖壑窮險勝景有鄒嶧山宋逸齋王氏詩補傳云鳧繹二山皆徐國之地繹與嶧同李迂仲詩解曰保有鳧繹之繹卽禹貢所謂嶧陽也陳大猷書解旁注薛氏云嶧山在襲慶府鄒縣此山始無土壤故山陽孤桐可貴程氏春秋分記嶧山在鄒縣東南三十里高秀獨出太平御覽嶧山事迹引爾雅曰鄒嶧純石相積連屬而成山鄒山記曰鄒山古之嶧山也孤桐之所植邾文公之所卜山下是鄒縣本是邾國魯穆公改鄒山從邑變故謂鄒山嶧陽猶多桐樹宋會要大中祥符元年詔封嶧山神爲靈崑侯迨聖朝屢頒詔誥祀典所載名山大川依期致祭民人旣被其福而無旱乾水溢之災矣

**明景璠游繹山記**正德甲戌予奉使魯藩至徐州取道歷滕陽過鄒縣未至鄒廿里有山甚高望之石磊磊然不見土木玲瓏嵌空紫翠湧鬱問之居民曰繹山也嘗聞繹在魯南兼意秦碑之或在也冀一登焉又行而前隸人曰此去有八九里稍南一道循之四五里可至也從之遂

至麓憇一寺捨輿馬解衣登焉約五六里許又至一寺時七月一日天將雨熱甚汗出目眩足力不任慨然曰吾之不竟登也豈非數耶取席布地偃息數刻覺後清爽鄒尹揚環聞予至來迂於此與共飯焉既飯復登戒僧一人持盂隸三人執几一蓋一筆墨各一且行且憇日則蓋雨則蓋泉則盂挹之平遠則據几奇峭可書則命筆墨竟其顛覓秦碑焉無有豈所謂繹山之碑野火焚也耶停悵者久之惟茲山之石不相連屬方圓平欹各各異象其高大者數十丈小者亦數丈如屋覆如偃蓋如走丸如斧劈如抵壁如累棋如馬首如巾敷几筵如砌如累如戲擲其大可訝者絕頂一丸高數十丈欹置平石下臨不測有可轉之而不轉之勢或曰神戲爲之理或然也其草木悉與他山同而此獨宜桐桐皆自生多聳直蒼翠可材也書曰繹陽孤桐而注謂其可中琴瑟之用豈得茲山玲瓏嵌空之氣而然歟宋封爲靈巖侯有碑刻此三字下山北行十餘里風雨驟至雲如潑墨回視茲山彷彿有無之間心神飛動又惜不能少留雲氣中耳

**通志之梁山**在福山縣東北三十五里連文登縣界周圍五十里三面瀕海史記秦始皇登之梁刻石紀功郊祀志齊有八祀之梁爲陽王漢武登梁山聞稱萬歲卽此其東南海水中有一石俗傳武帝造橋有雨石銘尙存歐陽脩云古秦篆遺文纔二十一字曰於久遠也如後嗣焉成功盛德臣去疾御史大夫臣德其文與嶧山碑泰山刻石二世詔語同而字畫皆異惟泰山爲真李斯篆爾此遺者或云麻温故學士於登州海上得片木有此文豈杜甫所謂棗木傳刻肥失真者耶

**明齋字登牛山記**牛山在臨淄之南十里予往而登之秦沂駝稷四顧而有風烟雲日百里而見余因悵然而悲憊然而笑戚然而憂從者曰公登牛山何悲也何笑也而又何憂也余曰昔齊景公與文孔梁丘據晏嬰登此顧其國而流涕曰美哉國乎若何去此而死也二子皆從而泣晏子以爲君不仁二子諂諛而獨笑余則以景公亦名諸侯也其在當時朝圖暮策輕服薄膳與二三子皇皇然以應答乎友邦者爲此尺寸之地也乃不得常御而終奄然以逝在人情孰曰不悲余固悲之也

爲晏子者當告之曰君悲之誠是也但自軒農以來皆不免於黃土而其聲名昭赫至于今蓋有萬世不死者在願君修之何如耳乃徒告之曰使賢者勇者不死則太桓莊靈常守之矣吾君安得此位乎若然則如云賢者亦死又何必賢勇者亦死又何必勇且歆之以位則子孫者皆幸其先君之死而及之也晏子齊之賢臣也而其言若此予故笑之也昔孟軻氏以牛山之濯濯非山之性乃由斧斤牛羊而致以喻人之禽獸也非人之性乃由梏亡而致余今登茲山也見其濯濯如當時所云而天下之不梏亡其性者亦鮮矣仁義之心雖余固有存存亡亡云胡能定余故憂之也從者曰善乎公之登牛山也一覽而三益

**明喬宇游沂山記**季夏癸巳日黎明出蒙陰城霧大漲山彌谷盈已猶不收突見兩虹澗走弘治戊申季夏榆社山中暨此兩見比涉沂水宿于縣甲午緣北岡行遥望沂山礮礮岌巘特嶄羣峯始知名東泰山者有由然也且載于周禮職方氏爲青州鎮在三代時已名故自漢武禮官祠以下至于今列諸祀典未刻過穆陵關關在大現山上傳云齊桓

公曰賜我先君履南至於穆陵卽此又爲劉宋武帝伐南燕所度之地嶢嶠嵒堞聳帶壯峙遵關而北十里叅政審君惟臣來迓香帛折而西至東鎮廟宿于齋房乙未習祀儀潔蠲齋沐丙申昧爽臨事畢遂明見山上霞光彩映汎汎煒煒頗爲奇玩稍頃又頓陰霏驟暈雨乃急下期以飯後往觀百丈崖又忽杲然出日向廟西山行十五里皆涉澗躡礫肩棘踵莽而入時聞鳥聲清哢於林間意爲奇羽逸翮而蒼蔽不可覩至于崖下崖削立百丈廣數十丈瀑布泉自中而下蜿蜒垂動宛如玉龍湍奔流迅轉轉作響又若飛雨倒空沫沫四下並泉石常沾苔潤蘿下漚爲澄潭幅員十餘丈中有大石色皆青葱可愛坐崖下命從者汲泉烹陽羨茶以飲其馨清美暢達肺腑又擇崖石可大書者二所在泉之南高二丈許泉之北高丈許乃伐木爲梯余登而書惟臣在下視之爲余凜凜南書瀑布泉北書百丈崖潭之石二爲書飛虹流電篆畢惟臣持酒觴余于潭上坐石仰對飛泉意象覺在世表因嘆古今遨遊之士但知廬山開先之有瀑布泉耳而此泉亦爲瀑布且出自東鎮乃

泯爾無聞殆地僻林奧人跡罕臻故奇瑋之士偶無所遇歟抑造化秘  
惜不欲翕露待時而顯歟然則天下之物體同而顯晦異者豈獨茲泉  
哉山出三泉一爲沐水出山後流經沂水縣東北達于莒入沂州一爲  
汶水出東麓東南流入安丘一爲瀾水出西麓一名巨洋水國語謂之  
具水袁宏謂之巨昧王韶以爲巨篋東北流至益都壽光入于海卽此  
瀑布泉也

明陳沂游海上鼇山記鼇山一曰勞山有大勞小勞齊記謂泰山高不

如東海勞始皇登勞盛山卽此以勞於陟也在今卽墨之東南四十里  
東西南直距海上山形延亘若城雉峯起如堞縱橫高卑直突旁擁相  
系凡五百餘里其奇峯怪石不能以狀崩崖幽谷深巖絕壑峻嶺曲崦  
不盡以名棲禪鍊真靈異之蹟不可以徧土人以峯名峒山多峒名嘉  
靖癸巳秋余按縣至自膠聞藍侍御王夫悉山之勝云土人不易到不  
能自遇與王夫出東郭三十里由三標山出海上蒿莽中十里纍纍數  
丘一高起曰鶴山至則攀陟亦峻石哈呀磊砢憑籍爲磴松多偃枝古

榦夾石而上一道宮曰通真庵後有洞傍巨石鑿道人丘長春大書鶴  
山洞余亦勒同游歲月鼇之東麓也西南諸峯插天橫亘數重望之若  
劍戟羽鏃森列而恍然若雲並海濱東南行二十里山皆巉巖一峯深  
秀多長松怪石由叢石歷塊轉折成路至獅子巖下有臺宇乃宋太平  
宮也巖側有三石結架如戶出其上時夕陽在峯頂海濤撞激直至峯  
下是夜宿道人居夜半月色潮聲不能寐起坐臺際鷄鳴與王夫登巖  
見日自海隅湧出雲霞異色海氣蒼漭日光浮金萬里世之大觀也是  
日巖下題石門曰寅賓巖壁大書一詩從宮之南渡飛仙橋尋白龍老  
君華陽諸洞降巘乘小堦從者徒步緣海灘亂石間行轉入山麓遵海  
而東歷番眼嶺下臨不測屢策杖惴惴由惡水河亂石灘皆海濤中行  
山廻從蛟龍嘴歇肚石黑松林皆山腹處極險非人跡所至有下清宮  
在山之隅不能至從黃水灘西北入山中凡三十里始有人居就樹下  
飯由山徑歷黃山峒黑山峒觀音崦皆轟起數百仞極奇秀又三十里  
入羣岫間北峯峻極山半隱隱臺殿至則巉削攀絕僧垂木階下乃援



而升上有石洞洞額大書明霞洞大安平未題余勒詩一章其中空洞  
上如厦環石如堵前設戶牖洞左有佛宇僧廬右石門從磴數百級上  
絕壁數仞下視滄海與天浮動島嶼皆空壁下一草庵老僧定處是夜  
宿洞中明日晨飯畢下山經石瓢清涼甸聚寶峯三里山峯下有道院  
亦宋所建上清宮宮傍石間跨朝真迎仙二橋橋側巨石鏡詩十絕亦  
丘長春書字畫端整余書如夢令詞于右由寶珠山八水河十五里登  
天門山極峻險峯多奇狀如仙釋擁出山口復有二峯若石疊就高數  
十仞兩楹相峙上逼雲際下瞰滄海峯有丘長春大書南天門三字大  
抵海上之山人跡罕至道釋之外鮮有登陟丘蓋宋南渡後避世于此  
者從天門南下歷數十峯初視若蟻壤且近行數十里不絕每峯皆峻  
大而仰莫及者降至麓瀕海上曰韓寨上有聚仙宮碑勒元學士張起  
巖記飯于宮復從西北入山循滄牛澗磚塔嶺僧帽石大風口三里河  
小風口瘦龍嶺清涼寺仙跡橋金剛峒二十里至巨峯其峯最高而奇  
周山之峯異狀百出徘徊不能去巨峯下數石百仞壁立梯窮徑絕有

兩石若劈劈處見一竅上聞犬聲一僧垂木梯下請升遂援之而上由  
壁中行轉至一茅菴甚明潔左有佛宇嵌崖隙甚幽西北羣峯直出其  
後東南海色相應庵前牡丹諸奇花偃松異木其建築木石所植花卉  
皆僧負戴梯而至者但苦行無智慧心余留二偈石壁間乃悟供具麥  
飯野筴謂不圖得遇大知識是夜宿庵中僧立牖下竟夜明日因題其  
夾石處曰面壁洞紀同王夫來游事及侍從之名澗上壁大篆靈鷲庵  
三字從故道十五里出海濱循山麓西北行皆平地四十里至華樓山  
下王夫有別墅即其祖贈侍郎公之墓側從墅後緣澗仄徑而陟數里  
至顛松千株皆偃蓋從石隙間深入有萬壽宮老君殿少憩尋翠屏巖  
余梯而大書之時已晚宿道人庵明日晨起與王夫尋古遺跡周山之  
石摩勒殆遍多金元人作者從王喬峒至凌煙峒下題同游歲月峯隙  
見海色遠映道人吹笙笛于高架峒上飄然有物外之想遂循金液泉  
夕陽洞石門山至清風嶺題名于嶺之石門又步至華表峯下一曰聚  
仙臺其峯疊石數十仞峻拔且秀奇少焉與王夫別至是山游凡五日

行三百餘里王夫所計行從止宿不失尺寸其弟困困於窮絕處誤乾  
餽餽茗楮筆丹墨具在從行兵吏雖跛足不前而興亦不淺山樵海漁  
之人爭效輿力石工數輩分處供事故余之興益豪所得詩二十餘首  
去今已往恐莫有繼之者矣下華樓山復乘輿四十里至縣所未至者  
五龍嶺下清宮橫石宮也海中諸島東有大管小管車門滄洲南有鮑  
魚老公車屋大古小古浮島皆登陟所見者

**元楊奐東遊記** 壬子春三月十六日庚子東平行臺公宴于東園是日  
衣冠畢集既而請謁闕里迨丙午迺命監脩官盧龍韓文獻德華谷劉  
詡子中相其行丁未同德華子中暨攝祀事孔構器之梁山張宇子淵  
汴人郭敏伯達出聖嶽門幕府諸君祖於東湖之上東行六十里宿汶  
上縣汶上古之中都也先聖之舊治魯定公九年宰此縣署之思聖堂  
是也有杜子美聖嶽詩刻王彥章墳祠在西城外以斯人而仕於梁時  
可知矣戊申是日至兗州會州佐孟謙伯益教官張鐸振文話嶧山之  
勝爲甚詳子美所謂浮雲連海岱平野入青徐者登南樓詩也徐在南

四百里青在東北七百里海在東北不啻千里岱嶽一百餘里吁二三  
千里之遠今一舉而至與其終身拘拘儒儒於百里之內者不亦異乎  
巴西拉振文而東不四五里過泗河地頗高敞南望鳧繹諸峯出沒於  
烟蕪雲樹之表使人豁如也又一舍許達于苗孔村見曳而斷者其魯  
城歟鬱而合者其孔林歟不覺喜色溢於眉睫遂入自歸德門魯門一  
十有二正南曰稷左曰章右曰雩正北曰閨左曰齊右曰龍正東曰建  
春左曰始明右曰鹿正西曰史右曰麥歸德其左也當時天下學者多  
由是門入故魯人以此名族長德剛又率諸子弟姪迓於廟之西相與  
鞠躬趨大中門而東由廟宅過廟學自毓粹門之北入齋廳在金絲堂  
南燕申門之北堂取魯共王事也是日私忌不敢謁庚戌鐘鳴班杏壇  
之下痛廟貌焚燬北向鄆國夫人新殿設繪像脩謁而版祝如禮告先  
聖文宣王畢降階謁齊國公及魯國夫人之殿殿西而南向者尼山毓  
聖侯也次西而東面者五賢堂也謂孟荀楊王韓也碑孔中丞道輔文  
遂飲福於齋廳執事者族中子弟也進退揖讓禮貌可觀信乎遺澤之

未涸也焉知教養之久明詔之下人物彬彬不有經學如安國政蹟如  
不疑者乎杏壇二字竹溪党懷英書壇之北世傳子路捨丁石蓋石之  
鑿也壇南十步許真宗御贊殿也七十二賢并諸儒贊從臣所撰貞祐  
火餘物也手植檜三兩株在贊殿前一株在壇南業已焚燬趙大學秉  
文麻徵君九疇有頌有詩世多傳誦之次南碑亭二東亭宋碑一呂蒙  
正撰白崇矩書金碑一党懷英撰并書篆西亭皆唐碑一碑崔行功撰  
孫師範書碑陰刻武德九年十二月詔又乾封元年二月祭廟文一碑  
江夏李邕撰范陽張庭珪書開元七年十月建次南奎文閣章宗時初  
閣之東偏門刻顧凱之行教吳道子小影三像東廡碑六皆隸書西廡  
之碑八隸書者四餘皆唐宋碑也是日出北偏門由襲封廨署讀姓系  
碑文又北行由陋巷觀顏井亭亭廢矣北出龍門入孔林徘徊思堂之  
上由輦路而北夾路石表二石獸四石人二獸作仰號之狀拜奠先聖  
墓如初禮墓前有壇石厚三尺許方如之其數四十有九後漢末嘉元  
年曾相韓叔節造東連泗水侯伯魚墓南連沂國公子思墓世家云相

去十步耳而密邇若此疑後人增築之也然規制甚小禮之所謂馬鬣  
而封者是也子思之西石壇居攝元年二月造有曰上谷府卿者有曰  
祝其卿者先聖墓西北白兔溝也二石獸狀甚怪林廣十餘里竹木繁  
茂未見其比而楷木以文爲世所貴無荆棘無鳥巢林東三里講堂也  
林與堂俱在洙北泗南按世家云周敬王三十六年孔子自衛反魯刪  
詩書定禮樂繫易於此硯臺并在西惜去秋爲水漫沒矣辛亥謁周公  
廟廟居孔廟之東北三里有真宗御贊碑車輞并在正東少南水清白  
而甘俗呼漿水井者是也廟北雙石梁井石上綆痕有深指許者百步  
許得勝果寺曾故宮也殿之東北大井圓徑六十丈深二丈水色墨如  
也東過顏侍郎墓林城之址顏廟也廟中孤檜高五丈許由曲阜西復  
東北行一里入景靈廢宮觀壽陵避諱而改也東北少昊葬所宋時  
疊石飭之前有白石象爲火爆裂壇之石欄窮工極巧殆神鬼所刻也  
讀碑記始知草創於祥符潤飾於政和此亦人君貪侈之心將以徼福  
者也福可求乎哉大碑四諺云萬人愁者是也而二碑廣二十有三尺

濶半之厚四尺。龜趺高十有三尺。濶如之厚四尺。龜趺十有八尺。二碑廣二十有四尺。濶半之厚四尺。龜趺高十有八尺。濶十有六尺。厚四尺。龜趺十有九尺。一在城之外。一在城之內。無文字。意者垂成而金兵至也。陵曰壽陵者。誠何謂邪。入東門。復西南馳。觀漢之魯諸陵大塚四十餘所。石獸四石。人三人。胸臆間篆刻不克盡識。有曰有漢樂安太守廉君橐塚者。有曰府君之某者。折而北。渡沂水。入大呀禪院。觀遠泉水。中石出如伏龜。怒鬣寺碑云。魯之泉宮也。薄暮歸。自稷門望兩觀。穹然以少正卯之姦。雄而七日之頃。談笑剔去。則知舜刑四凶。使天下翕然服之明矣。登泮宮臺。臺下水自西而南。深丈許。而無源。其西靈光殿基也。破礎斷瓦。觸目悲涼。壬子復由縣城東北行十里許。過陶樂村。南望脩壠。蔓延不絕者。周之魯陵也。東南五里。達脅溝村。拜聖考齊國公墓。而林廣四十畝。墓前石刻甲辰春五十一世孫元措立石。溢津高。翻書溝水在林之東北。入於泗。其南防山也。而山之峯東西五禮云。合葬於防是也。林之北東蒙路也。自西峯而南。謁顏子墓。石刻曰先師兗國公大

定甲辰二月先聖五十四代孫承直郎曲阜令襲封衍聖公孔摠立石。太原王筠書墓前一石。僅二尺許。兩甲士背附而坐。一執斧。一執金。吾正北有小塚。不可考。顏氏子孫二房在少東。上宋村是日。東南行并戈山。而西由白村。歷西魯原。達東魯原。館癸丑穿林麓。而東約六里許。達尼山。五峯隱隱在霄。漢間而中峯特迥出。昔之所謂坊。其頂者是也。廟廢雖久而規模猶可見。其西智源溪橋也。端南即大成門。次北者即大成殿也。其東泗水侯殿。其西沂水侯殿也。大成之後。鄆國夫人殿也。其後齋所也。西有齊國魯國之殿。齊國之東而南向者。毓聖侯殿也。大成之東齋廳也。兵餘猶存焉。正北中和壑也。廟之西南觀川亭也。瓦礫中得一斷石。蓋前進士浮陽劉燁夾蘆辨也。或曰夾驢劉惡其鄙俚。故辨正之。夾蘆峴在尼山西。由亭之東西旋而下。得坤靈洞。石角澌澌不可入。族長云。廟戶管用吉成。嘗持火曳綆而入。比入數丈。忽隙間有光。睹一室。其廣兩楹。許中橫石床。石枕。皆天成也。而不可動。今五十年矣。以管與吉幼而瘠。故可入也。所言如此。洞名劉燁之所刻也。因涉沂水。過顏

母山下觀文德林以草木障翳廟與聖井無所見尋舊路復達魯原西  
南瀕喝下而出由桑家莊歷峻山二十里而近達四箕山至鄒國公墓  
墓在廟東北有泰山孫復碑孔中丞立石其西大塚七比正墓差小無  
從考之南有亞聖寺行四五里過黃注村又十里由石經埠正南少西  
行二十里達鄒縣四月甲寅出南門二十五里達嶧山之西北絕澗亂  
石如屋復西北行游太湖懸鐘二洞東南行入燕子岩僕以病足坐岩  
下諸君且示嶧山圖蠟紙按圖指顧若仙橋之巨石七真之西軒下瞰  
紀侯之重城漢相之故塚一如眼底如王女峯千佛塔尤號奇絕所至  
流水修竹雜花名果殆若屏面而容縷數哉逼夕陽下山迤邐由西北  
而進達于縣之南關造鄒國公廟庭奠乙卯出西門北行十里入罔山  
寺沿竹徑渡橫橋出山東北行二十五里達馬鞍山謁孟母墓北行十  
五里達趙山莊又十里許達于魯城南登郊臺臺東西五十八步南北  
四十步魯之臺可見者三是臺與泮宮臺莊公臺也北涉沂水由竹徑  
登浮香亭亭以梅得名小北一石穴茶泉也亦竹溪書而不名緬思前  
輦風度又有足敬也丙辰丁巳將訪矍相圃不果戊午登西南角臺墜  
射圃圃在歸德門裏巳未辭先聖於杏壇之下

**明登**

**正德**五年夏天子命予東祀畢將之沂山戊子渡汶

河北至關里巳丑晨衍聖公陪謁大成殿由大中門入左右皆國朝碑  
亭再入爲奎文閣閣甚宏麗上藏秘圖古典億萬卷左右列唐宋金元  
碑亭入大成門過杏壇杏壇二字乃金完懷英書肅然至殿下成拜仰  
瞻宣聖配哲塑像煥儼如在歷觀古碑半已剝落又觀先帝御製碑  
乃西涯翁奉命代告者手植檜三株俱已焚擲尙有一枯根可二三次  
又謁啓聖公殿殿五楹中設神龕一位覽金絲堂堂亦五楹蓋取曾共  
王事以名庚寅晨雨對南溪小山諸亭幽妍清爽風景佳甚午後關里  
東謁顏子廟其前爲陋巷有顏井亭北出龍門入孔林有石人獸夾于  
路拜宣聖墓前有壇石四十有九造於後漢魯相韓淑節泗水侯伯魚  
墓在東沂國公子思墓在南相去甚密邇四代白墓在西北隅五代求  
墓在東北隅六代箕墓在東南隅七代穿墓在西南隅自漢塚中興祖

海岱山記 卷之五  
墓以下皆分列於外林廣十餘里皆奇草怪木不可名狀繁柯茂枝充  
蔽空日且下無荆棘上無鳥巢實宣聖在天之靈有不可誣者泗水經  
於北洙水環於南林跨石梁于上以通入林之路梁之南為古之魯城  
又南謁周公廟廟在孔廟東北三里有真宗御贊碑有車輞井又西行  
至東莊觀城西竹林林間乃舊沂水流帶宛然有江南之景歸過其家  
有大石甚奇予為題曰瑞雲辛卯起行

明舒芬謁關里記 嘉靖三年閏月芬舟抵濟寧問道謁關里得九川呂  
君為主伍寒泉適以部事至偕行甲子發濟寧東趨東平驛六十里又  
東趨四十里乃至是夕薄公館沐浴明日早具菜菓携麻姑泉入廟修  
釋菜禮九川曰此禮廢久矣禮畢入寢殿拜鄆國夫人入右殿拜啓聖  
王出觀杏壇壇在正殿前有新杏衍亭出大成門觀手植檜孤榦古色  
若虬旋起未已出奎文閣至人中門又至儀門見兩堦栢陰鹿數十皆  
黃色乳而馴却登奎文墜之北南東皆山環抱若人冠冕佩王執圭秉  
笏端拱正揖逡巡於三十里外正南為綱山其外為鳧山山之麓為伏

羲畫卦所東南為防山其外為尼山尼山之南為黃山又其外為顏母

山為嶧山為三峯山

亦名車  
稍山

蓋二百里而遙正東為東山其外為九龍

山又其外為鳳凰山為陪尾為蒙山山之南為夾谷蓋三百里而近東  
北為馬鞍山山之夕陽為夫子刪述所其外為臨樂山為昌平山又其  
外為龜山蓋二百里而近正北為九峯山其外為甌山為杏山又其外  
為梁父為云云為亭亭為介丘為徂徠至所聚嶙為泰山墜之烟雲縹  
緲蓋百里而遙其西則廓然惟淺壠平阜依稀環抱若宮墻若城墉周  
遭數十界水曲曲可辨其內為沂為洙為泗其外為漕為洸又其外為  
汶為濟大抵皆西南流會于今之濟河乃折而東經徐以入于淮也然  
沂水出于尼山經闕里之南西流匯于達泉溢于雩水行七十里入于  
泗非東出于岱麓之沂山至于下邳行六百里之沂也洙水出臨樂山  
西北流浮孔林入于泗非出于交城北之洙也泗水出陪尾山西流經  
闕里之北百里強折而南會于沂入于濟非東出乘氏南東流至睦陵  
行千餘里入淮之泗也汶水有仙臺原山寨村三源皆西流合于泰安

之下又西流六十里合徂徠源之小汶河乃注于洸而南入于濟惟良泉則仰出于黃山北流經東峙羣峯之外以入于泗奇矣九川曰凡山皆發于崑崙而至爲都會山必西峙水必東流關里之山環北東南三面而沂汶洙泗又皆西逝蓋逆矣芬曰地勢東南傾而水流焉氣斯盡也中原地氣此其障與夫黃河排積石入中國衝潰突厥其患不啻獫狁金元非依嶽諸山東奠之則青徐之境與碣石俱淪矣茲土山水俱逆實啓中國元氣之運故依於五嶽得稱宗焉而伏羲畫八卦以始斯文孔子作六經以終斯文皆于茲土亦萬古人心之障也九川曰關里當奎分漢書云魯奎婁之分楚與步天歌言角東壁衛分楚曹然則斯文在茲與天地之交元氣之會與聖公曰予今日始有聞矣遂下東登詩禮堂堂舊名延賓又入觀孔氏家廟廟前爲舊金絲堂基卽魯共王欲壞處九川曰事亦神哉芬曰不然昔夫子厄于陳蔡大夫而弦歌不衰大夫乃感而去共王壞室時孔氏子孫無如之何亦惟金石絲竹是修耳共王果亦感而止故君子貴自艾聖公寒

泉皆躍然曰予於處憂患之道幾矣已乃訪聖公宅與修士相見禮公固讓廢之午往拜顏廟于階之東北有樂亭于前儀門外有古井其陋巷在廟之階東南旣而出城北四里所拜孔林自漸門入二百步餘爲夫子墓上封高丈餘林木深秀無禽鳥聲洙水漾于前綠淨可染其西南有子貢舊塲時有爲除草築室者東南隧道左有駐驂亭出饗殿前觀二石人四石獸甚奇古聖公曰人則翁仲獸則或以前二爲角端然與芬曰獸則外一爲神羊卽獬豸內二爲駁馬人則魏明帝鑄銅列于司馬門外者號翁仲恐墓前石人別有稱或者方相之類與上前門坐少頃九川復引至刪述所距孔林東北亦四里因元石書院九川增大之且易書院名爲洙泗講壇壇實據二水之勝而馬鞍山又別委三峯如筆架于苒果神秀哉壇後爲聖公別墅亦造焉因與之別而往拜周公廟于城之東北其地隆聳益足俯瞻北南東三面之奇也公之後有東野氏殊零落九川曩新其垣廟擇一人典修除事爲月給米焉明日返于昌平九川曰大遊大觀不記不可時九川方欲圖關里而未竟也芬

因與區別其山水向背而成之并書此行所觀見者于左寒泉名餘福  
爲吳人九川爲關中人名經芬姓舒氏世家江西梓溪之上聖公爲先  
聖六十二代孫聞韶云

**明喬宇觀東海記**六月庚子至于東海神廟行謁禮又五六十步至海  
濱縱望見汪洋碧濤上浮浮有氣色數丈左右皆有孤島天水無際不  
風而涌無雲而晦片航一鳥不敢浮越信乎爲千水之朝宗四瀆之奔  
赴百靈之會萃也夜與賓君惟臣坐海上玩月珠光玉影下涵上盪晃  
晃萬里因高詠亦壁賦逸興飛動各限韵賦詩談至二鼓夜潮奄至騰  
風逸馬難喻其速温汾揭汨旬磕盤湧水勢坐添數尺濺擊几下可駭  
可愕又貪其景臨覽不釋不覺逾夜分乃歸宿于廟厥明辛丑篆碑省  
牲恭整祀事忽澍降大雨橫灑良久乃息官從咸欣欣然以頌海神靈  
應之速壬寅昧爽余亦恪肅奉祀祀畢又降微雨雨後卽晴衆又凜凜  
然以頌海神昭格之顯與從臣享胙于廟

**宋魯齋陶公泉記**

按圖泰山之比與齊東南諸谷之水西北匯于黑水

之灣又西北匯于栢崖之灣而至于渴馬之崖蓋水之來也衆其北折  
而西也悍疾尤甚及至于崖下則泊然而止而自崖以北至于歷城之  
西蓋五十里而有泉湧出高或至數尺其旁之人名之曰趵突之泉齊  
人皆謂嘗有棄糠於黑水之灣者而見之於此蓋泉自渴馬之崖潛流  
地中而至此復出也趵突之泉冬温泉旁之蔬甲經冬常榮故又謂之  
温泉其注而北則謂之灤水達于清河以入于海舟之通于濟者皆於  
是乎出也齊多甘泉冠天下其顯名者以十數而色味皆同以予驗之  
蓋皆灤水之旁出者也灤水嘗見於春秋魯桓公十有八年公及齊侯  
會于灤杜預釋在歷城西比入濟水自王莽時不能被河南而灤水之  
所入者清河也蓋預失之

**明喬宇觀東海記**

山東濟南之名泉著于碑品于論詳于志傳于人

口者七十有二在府城自金線珍珠以下在章丘自百脉淨明以下在  
泰山自白鶴水簾以下在新泰自玉寶以下或取其澄澈或可釀或可  
已目翳或如垂練或縷縷如簾或色如玉明如鑑皆不若城西之趵突



泉其源出山西之王屋山下伏流至河南濟源縣湧出過黃河溢爲滎西北至黃山渴馬崖又伏流五十里至城西突冒而出爲此泉昔人浮糠于源竟達于此其泉凡三穴其出澗高尺許珠沫大湧土人云數十年前高二三尺許豈氣有盛衰然耶其泉之周圍皆芳草清蘭垂流帶波可臨可飲其出也又會諸泉入城匯爲大明湖占城三之一由北水門出與濟水合沛漫無際又流爲小清河爲濟之南源經章丘鄒平新城界入海其歸也大其源也千里所以爲名泉之冠泉上有觀瀾亭余小憇于上亭壁有趙松雪詩因次其韻遂生策杖王屋尋源之興

明李裕遊濟南大明湖記

濟南而高山其地低窪有七十二名泉皆散

流匯爲大明湖由北水門注於濟縈迂東流數百里達於海湖占城內地三之一延亘長堤堤傍多柳堤上跨七橋以通諸泉之流泄碁布於中若洲若渚若汀若漱者以百數爲歷下勝槩余至濟南閱四載未獲覽湖上之勝成化己丑左長史屈公天錫新構軒於湖北之湄其夏邀余與葉公拱宸鄭公德聚劉公行恕董公國器張公鳴玉吳公大祿至

軒臨清以嬉汎覽湖上水光映天澄鮮一碧屬玉水鴉浮遊而先後洲渚間崇林茂柳輪幽呈秀空翠輕煙舒歛異狀誠爲佳致於時主賓獻酢交相酬酌情思甚暢天錫命僕艤三舟於水涯起席曰值茲繁華佳景是湖不可不遊余八人登舟列坐命歌童三五載小舟前導庖丁鐺釜之類後舟隨之舉棹停橈隨流曲折悠漾柳陰中遇奇處卽維舟取魚果蔬蓮菱之品隨折隨供而絲竹管絃之聲洋洋盈耳效鄭公捲荷葉作碧筒杯流飲無筭時清風徐至荷香襲人心凝形釋與萬物冥會恍若身在閨苑蓬萊間遂循南岸至歷下環波水香三亭亭瞰湖濱宋曾子固知齊州重建今湮圯基存余與拱宸輩深嘆古人之樂事四百年來無一人繼曾後而新之者比日將申舟由北岸復至軒下飲茗天錫復携具偕余輩登北門城樓啓窓四顧其泰山綿亘百里重疊而南拱華不注峯虎牙傑立於其東鵲藥諸山環抱於西北俯視白雲巨合諸水皆在階阼下而東究登萊數州之土壤俱在望中濟南山川形勢亦雄矣哉時主賓皆醉日已西墜嗟夫佳山秀水皆天作而地成之無

處無之是以賢人達士雅好者隨所遇而窮探遠索於山谷草莽間得勝卽爲臺爲亭爲池沼遊覽而品題之然後得美名而傳之後世若未之石城諸山鈔鈔諸泉不見遇於宗元滁之瑯琊之秀釀泉之美不見稱於宋叔終蕪沒於空山荒野人孰得而知耶是湖子固昔嘗游之題品載於郡志自時厥後寥寥無聞今余因天錫邀始得偕同志者周覽一湖之勝以舒鬱滯之懷乃余之深幸而湖之名益增重雖然余與諸公皆膺民社之寄一賞而足奚可就遊廢務如山簡習家池惟知酩酊倒載而歸以犯荒佚之戒乎

**明喬宇觀泗水源記**泗水縣東行四十里至林泉寺以泗泉在東又多

古林故名明日觀李希賢詩于壁次之出寺南行折東數百步是爲泗泉源陪尾山並發穴相去僅二丈許白石罅各殊狀或趺突或沸如珠回旋又出晝夜不竭又有芳樹幽花澄鮮帶映是日晴好延佇容與見諸穴若湧扶光自內而出溶溶金色散於澗外復慨然興想吾夫子講道之所遂飲泉一勺又汲于寺飲其茗俾不徒經行於名泉之濱矣泉北合循泗水縣西經曲阜貫兗州至濟寧分南北流南入于徐州境北流入于會通河爲其引以資漕運利航楫又能納蓼白馬嶮泮沂黃諸水以益其流是宜與羣泉別遂篆泗水二大字于泉之石以行

**明喬宇渡汶河記**季夏三日冒雨南行十里嵐氣切衣又五十里至大

汶口中央有峻石巍峙水落巔露始敢以渡時河水泛漲懷冒因留宿小寺依依古樹環接墟野遂留詩于壁汶河之源有三發于泰山傍仙臺嶺暨萊蕪原山之陽寨子村至州靜封鎮合焉名曰塹汶西南注流入濟奔放湍急南北岸相距一里明日循水滸而東一里許登筏乘上流順而西下其筏縛八木爲之繫大口甕合二千四隅四方又綴葫蘆各四枚以浮筏上荆編藉焉氈席肆焉設椅坐于上用水工善浮者八人各腰葫蘆肩負而過中流傾濤駛波洶湧而來筏大搖動予頗有戒心南望曲阜九峯偃伏于前四顧泰山聳拔于後又復快悵登岸飯于歇馬嶺暮至泗水仍以筏而渡

**明喬宇游范公泉記**劉子汝忠餞予于青州城西門外范公泉上泉名

范公者宋范文正公知青州有惠政泮溪厠出醴泉頌古今人口不絕  
泉亦恒溢聚不涸人以泉應范公而出故名其泉馨冽其美可以已疾  
故今海岱之醫用斯泉以九藥所謂青州白丸者泉上有亭始構於范  
公歐陽文忠諸賢皆賦詩刻石亭中近圯頽韞霜桐雨幸而泉靈勿隕  
以伏審君惟臣以范公故葺而新之偶值落成予爲篆泉名扁于亭上  
予謂汝忠曰善哉斯遊乎西門之郊可餞之地近有堯駝遠有九迴佳  
山秀谷非不可宴娛但不過坐奇石登危峯眺雲物而已泯焉無感亦  
何益于予與子也今也觀其泉而思其人思其人而景其政念猛意發  
目有顧顏有歛心有警身有規先憂後樂之志亦不知何所來而繫吾  
之內而耿耿然也

明倫彙編 家範典 卷之五 東萊郡城之民隅僅里許有故臺焉寔當教場公署  
之後巋然數仞日就荒頽過而睥睨莫有問之者考之郡志爲南燕慕  
容氏所築號爲燕臺然父老相傳舊名望海疑秦漢間占氣候仙者之  
所爲也又嘗憶國初沿海設墾墩以備倭寇此殆其遺趾邪皆未可知

也蓋世道恬熙之餘斯民相忘于無事之天久矣嘉靖丙戌海道憲副  
碧崖馮公偶於閱武之暇陟而觀之則見神洞諸峯羅于東南渤海洪  
濤匯于西北而其雄峻渾闊之氣悉於是乎會萃焉乃慨然嘆曰茲一  
方之勝槩也可使其蕪沒於荒烟野草之際而與尋常丘垤等邪爰命  
工因舊基增而拓之高廣加三之一壘石於麓甃甃於顛樹亭其上亭  
外繚以垣墉可憑可倚前爲石磴四十有九級縈迴以上若凌虛御風  
然臺以丈計高不踰三而圍可二十有八亭以尺計高凡二十而圍則  
百餘材用以百計皆取諸公羨人力以千計皆取諸急逋里閭之下不  
知有是役也居然異境突出海邦山川爲之改色公於是援孟軻氏登  
山觀海之說以名其亭每值戎憲餘閒時一登焉或芳辰令節與郡之  
士夫燕會其中把酒長吟疑眸遠眺鯨波蜃氣浩瀚杳靄滄滄滅滅粲  
髯蕩乎吾之襟次而層巒疊嶽蒼翠肆兀相對恍然若超出於塵埃之  
表者至若風清雲淡雨霽霞飛市火村烟林霏鳥語若遠若近出沒不  
常朝暮之間變態萬狀會心感懷可喜可愕則斯亭之景豈非所謂瑰

偉絕特之稱者耶

**明陸武秦**論泰山雄峙東方為五嶽之長書曰岱宗詩曰魯瞻周禮曰充鎮傳曰天孫其名號雖殊然宗言統也瞻繫望也鎮主重也天孫言上際也咸極尊稱矣自今觀之濟南諸山其北麓也兗州諸山其南麓也青齊海上諸山其左翼也河東諸山其右翼也斯其為東嶽矣乎按漢官儀及泰山記云盤道屈曲而上凡五十餘盤經小天門大天門仰視如從穴中視天窓矣自下至古封禪處凡四十里又曰秦觀者望見長安吳觀者望見會稽周觀者望見齊黃河去泰山二百餘里於祠所瞻黃河如帶若在山陞蓋侈言之也迺若山南則有漢武遺栢天門則有五大夫松絕頂則有秦無字碑懸厓則有唐開元銘斯則泰山古蹟之最勝者矣五經通義曰王者受命易姓報功告成必於岱宗白虎通曰王者受命必封禪封者增高也禪者廣厚也皆刻石紀號著已之功績以自効也天以高為尊地以厚為德故增泰山之高以示報天禪梁甫之陞以示報地故史記稱無懷伏羲神農黃帝顓頊帝嚳堯舜皆封泰山禪云云禹封泰山禪會稽周成王封泰山禪社首秦始皇封泰山禪梁甫漢武帝封泰山禪梁甫肅然及蒿里石閭後又凡五修封泰山於是登封紀頌紛然相望於後世矣國朝革濫號以正典時遣告以明禋飭祠宇以壯觀凡前代誇張淫瀆之舉一切去之至於四方乞靈施舍牛羊金綺錢帛之類歲不下萬金皆有司掌之以濟一方之用則泰山功德之陰被於民者又豈直在降福受釐焉已邪

**明陸武秦**

論夫海者百谷之王而萬水之宗也山東三面瀕海登

萊二府島嶼環抱其在青濟則樂安日照濱州利津霑化海豐諸境皆抵海為界稱渤海云說文曰東海之別有渤澥故東海稱渤海列子曰渤海之東有大壑名曰歸塘歸塘者即莊生所謂尾閭也初學記曰北海之別有瀚海瀚海之南有渤鞞海則北海亦通稱渤海矣夫東方之極自碣石通朝鮮諸國直抵扶桑一望汪洋浩瀚溟滓無際外控夷落內衛中夏則山東形勢實稱險絕昔人謂齊得十二又豈豈為兵車卒乘之富邪博物志曰海中有蓬萊方丈金銀宮闕仙人所集十洲記謂

東海中五百里植死草返魂樹此固秦皇漢武所以縱其侈心求之而不得也顧其說荒唐不經然觀登萊海市樓臺城郭人物旌旗之狀成於瞬息千態萬像而不可摹寫則海中靈鬱之氣洩而為奇怪瑰瑋之物固亦理之所宜有也至於禽鳥木石之產金錫鹽鐵之利珠璣鱗甲之珍民實資之則海於東土其利固甚博哉

**明陸欽沂山圖論**

舜肇十有二州封十有二山濬川禹奠高山大川沂

山其一也周禮職方氏正東曰青州其山鎮曰沂山沂山在臨朐南百餘里即古蓋與朱虛地顏師古曰沂山在蓋鄭志曰朱虛有東泰山考之水經云巨洋水出朱虛縣泰山巖道元注曰泰山者東泰山也巨洋水即國語所謂巨水袁宏所謂具昧王韶之以為巨蔑亦或曰胸瀾一水也而廣其曰焉西則遠宗岱嶽東則俯視琅邪山之巔為百丈崕有飛泉下灑曰瀑布左麓為東鎮廟或曰中有堯栢背負鳳凰嶺南有穆陵關界長城書案二嶺之間管仲所謂南至穆陵是也大峴柳龍諸山環其左右門仰天逢山繞其右嵩胸委粟其北奎泉龍泉瀾水經其

後斯則沂山之靈秀為東方之巨鎮也自虞夏有望秩之典至周有埋沉之祭秦祠加車乘駟漢公王帶請於武帝曰岐伯令黃帝封東泰山武帝設祠具至山卑不稱其費乃令禮官祀之而不封魏文帝瘞沉圭璋隋制取近側巫一人主知灑掃唐加王爵年別一祭祀用大牢雖歷代祀典不廢瀆經甚矣我 國初削去封號稱東鎮沂山之神錫以金龍香奩有司春秋致祭有事則遣廷臣祭告秩祀迺正云

**明陸欽沂山圖論**

禹貢濟河惟兗州又道沈水東流為濟入于河溢為

滎東出于陶丘北又東至于荷又東北會于汶又北東入于海周官兗州其川河濟是已水經注及山海經云濟水出河東垣縣王屋山初名沈水東出温縣西北始名濟水又東南流當鞏縣之北而南入河與河並流過成臯溢出為滎水東流過陽武及封丘縣北又東過宛朐縣南至定陶縣南又東北流與荷水會東至乘氏縣西分而為二其一東北入鉅野澤過壽張西與汶水合又北過穀城縣西又東北過盧縣北經齊郡東萊郡而入海也唐李賢謂濟自鄭以東貫滑曹鄆濟青以入于

海宋樂史謂東平濟南淄川北海界中有水流入海謂之清河今按濟水在漢時伏流不見惟汶水自泰安州出者由故道東北流入海自元人引汶水入洸為運河 國朝因之凡汶水入海處皆築堰埧以遏其流而入海之道遂多湮塞今所謂大清河者乃汶水出洸河者復從張秋分流而入會齊東南諸山泉溝澤北經長清齊河至歷城會樂水經濟陽齊東武定青城濱州蒲臺利津諸州縣界入海寔濟河之故道也所謂小清河者即樂水發源濟南趵突諸泉流至城北大明湖出而合之由華不注山下東流會巨合水又東經章丘會清河又會漯河三水合流經鄒平長山新城又會孝婦河又東經高苑入博興樂安界合於烏河又北至馬車瀆入海或云古樂水自華不注山東北入為大清河自偽齊劉豫導之東行始為小清河云又按酈道元謂濟水在王莽時枯竭鄭樵通志亦曰濟水多涸竭自今觀之濟水勁疾能穴地伏流隱見無常乃其本性非真涸竭也濟水既伏流地中則發地皆泉又不特歷下諸邑為然是故一見為濟源再見為樂水三見為山東諸泉水而

溢為大小清河其實皆濟水也又何嘗見其枯竭邪淮南子曰濟水通和宜麥周官曰鸛鶴不踰濟風俗通曰濟齊也齊其度量劉向說苑稱濟能蕩滌垢濁通百川于海蕩出雲雨則濟水之德又古今所並稱

**明陸鉞闕里圖論**

闕里吾夫子所居按史記正義云夫子生於鄒長徙

曲阜仍號闕里括地志云兗州曲阜西南三里有闕里中有孔子宅與

廟謂之闕里者何考之酈道元水經註曰孔廟東南五百步有雙石闕

即靈光之南闕北百餘步即靈光殿基又其東有兩觀闕則闕里之名

義其在茲乎闕里之勝環以洙泗水源出陪尾山水經所謂泗水出魯

卞縣北山山海經所謂泗水出魯東北者是也韋昭曰泗在魯城北京

璠曰洙水在魯城北南則泗水夫子教於洙泗之間今城北二水之中

即夫子領徒之所也從征記曰洙泗二水交於魯城東北十七里闕里

背洙泗四門各有石閘去洙水百餘步惟郭緣生謂泗水在魯城南則

非矣史記世家曰孔子葬魯城北泗上弟子及魯人往從塚而家者百

有餘室命曰孔里後楊奐東遊記謂孔林東三里講堂也林與堂俱在

洙北泗南者是已迺若孔壁金石之流鄉講堂荆棘之自闢素書懸甕之符契千古之下詫爲靈異則吾夫子道德神化之妙遠而彌光此又其驗也自漢高帝過魯以太牢祀孔子明帝幸孔子宅親御講堂說經唐玄宗封禪迴幸孔子宅親設奠祭後歷代英君誼辟報祀日崇表章封護之典有隆弗替而闕里之名遂與天地並其悠長矣嗟呼士君子幸而生於聖賢之邦瞻依登拜亦既親其盛矣彼殊方異域之士思宮墻室家之美而不得一履其庭者斯圖庶乎其有考焉

**明陸欽漕河圖論**禹貢冀州夾右碣石入於河兗州浮於濟漯達於河青州浮於汶達於濟徐州浮於淮泗達於河山東漕運其昉于茲乎秦欲攻匈奴使天下飛芻輓粟起於黃腫琅邪負海之郡轉輸北河漢高祖運山東之粟以給中都歲不過數萬石至武帝通西南夷滅朝鮮擊匈奴城朔方轉漕甚遠而山東咸被其勞矣宋初都汴京東之粟歷曹濟及鄆入五丈渠至京師真宗時京東分廣濟河由定陶至徐州入清河歷呂梁灘磧之險至理宗時於堽城作斗門以遏汶流益泗漕以餉

邊衆而漕渠開矣元初開濟州泗河至新開河由大清利津諸河入海既而海口沙壅復從東阿陸輓至臨清入御河又開膠萊新河以通海道勞費不貲少有成效伯顏始創海運與濟州河並行未幾又用韓仲暉等言自安民山開河北抵臨清引汶絕濟直屬漳御名會通河夫汶水自古東北入海以智力導引使南接淮泗北通白衛實自元人始然河渠淺澁舟不負重歲運不過數十萬石終元之世海運不能廢也國朝初給餉遼卒海運如故永樂徙都于北亦嘗行之後尚書宋禮等復濬會通河於是漕利通而海運罷膠萊故道亦遂堽廢夫河漕誠利矣然泉源壅塞有疏濬之勞堰閘蓄洩有供役之繁徐呂洪流之泛溢淮楊襟喉之扼塞意外之患有不可不防者海運其可不講耶是故漕河者萬世之通利也海運者備不虞之變也膠萊故道者翼海運以成功也皆不可廢也天下之事居常者必慮變擇利者必思害輕重緩急達乎其勢而已矣獨漕政爲然哉

**明陸欽登太白酒樓記**太白酒樓在故濟州今濟寧府南城門上壯麗

雄偉四望夷曠有汶泗二水經其前開河安山山湖諸水滙其西鳧繹  
龜蒙徂徠岱宗諸山復左顧聯絡于東北皆紆青浮白以舒斂出沒於  
雲煙縹緲之際而齊魯方千百里之勝可指顧而具矣樓之規制不知  
重修何時其與昔之高卑大小殆不可辨意其上下千數百年間其修  
葺而因仍者殆皆此類碑階西南上有古石柱高可丈四五尺觚植而  
湧蓋其上周圍刻小篆記文者唐沈光之所作也其左階東南隅有二  
賢祠記石刻二通蓋昔州人嘗祀太白與知章賀公于其上者也祠有  
二賢何舊傳開元中以知章爲任城宰而來其來而止也嘗飲于此此  
樓之所以名也惟太白負竒氣好仙游其足跡幾半天下凡江漢荆湘  
吳楚巴蜀與夫秦晉齊魯山水名勝之區亦何所不登眺何日不酣暢  
而以酒樓名天下有二焉其在洛陽天津橋南董糟丘所造者其事尤  
竒備卓絕今其存亡興廢類不可知獨茲樓以沈光記文遂留傳至今  
豈偶然哉洪武十年三月道過濟寧郡將鳳陽沈仁知余好古也偕其  
客曹伯仁載酒邀游樓上撫讀唐宋金元以來詩文碑碣凡十數通於  
是太白之去世幾七百餘年矣爲之低徊慨歎久之旣下樓登舟二鼓  
矣乘月出草樓行五十餘里將入開河舟人大醉安行入野湖菱蒲中  
不知所向乃倚柳樹而息





古今游名山記卷之六

括蒼何鏜振卿甫編輯  
廬陵吳炳用晦甫校正

中嶽嵩高山 河南諸山泉附

嵩山總名按嵩高山者五嶽之中嶽也釋名云嵩字或爲崧山大而高曰嵩白虎通云中央之嶽獨加高字者何嶽居四方之中可高故曰嵩高山漢武帝登中嶽聞有呼萬歲聲於是以三百戶封奉祠命曰崇高邑至後漢靈帝復改崇高爲嵩高焉戴延之西征記云其山東謂太室西謂少室相去十七里嵩其總名也謂之室者以其下各有石室焉少室高八百六十丈上方十里與太室相次雜道書云自嶽神廟東北二十里至一山名曰東龍門其東有三臺山昔漢武東巡過此山見學仙女遂以名焉南有許由山高大四絕其北有潁水卽堯聘許由處猶有壇墠昔周靈王太子晉好吹笙作鳳鳴游伊洛間道人浮丘公接上嵩山三十餘年往來緱氏山近在嵩山之西也漢世有道士從外國將貝

多子來於高高西麓種之有四樹與眾木異一年三花白色香美物學記

唐韓愈嵩山天封宮題名元和四年三月二十六日與著作佐郎樊宗

師處士盧仝自洛中至少室謁李微君渤樊次玉泉寺疾作歸明日遂

與李盧道士常濛僧榮並少室而東抵眾寺上太室中峯宿封禪壇下

石室遂自龍泉寺釣龍潭水遇雷明日觀啓母石入此觀與道士趙玄

遇乃歸閏月三日國子博士韓愈題歐陽公集古跋尾云右韓退之題

上記龍潭遇雷事天聖中余為西京留守推官與梅聖俞游嵩山入天

封宮徘徊柱下而去遂登山頂之武后封禪處有石記戒人游龍潭者

語也近有使者東來付僕詔書并御祝封香遣告

嵩嶽太常移文合用讀祝捧幣二員府以歐陽永叔楊子聰分攝會尹

師魯王幾道至自緱氏因思早時約聖俞有太室中峯之行聖俞中春

時遠往僕為人間事所窘未遑也今幸其便又二三子可以為山水游

侶亟與之議皆喜見顏色不戒而赴十二日晝漏未盡出建春宿十八

里河翌日過緱氏閱游嵩詩碑上緱嶺尋子晉祠陟峻嶺道入登封出

北門齋于廟中是夕謁新治宮拜真宗御容稍即山麓至峻極中院始

改冠服以從者各輕齎遂行是時秋清日陰晚花幽草虧蔽巖壁正當

人力清壯加有朋簪談燕之適升高躡險氣豪心果遇盤石過大樹必

休其上下酌酒飲茗傲然者久之道徑差平則腰輿以行嶮峭斗甚則

芒躡以進窺玉女窻搗衣石石誠異窻則亡迤邐至八仙壇憇三醉石

千方抵峻極上院師魯體最溢最先到永叔最少最疲於是浣漱食飲

從容躋封禪壇下瞰羣峯乃向所跂望謂非神翼不可到者皆培塿焉

邑居樓觀人物之夥視若蟻壤世所謂仙人者僕未知其有無果有則

人世不得不為其輕蔑矣武后封祀碑故存自號大周當時名賢皆不

著姓名碑陰不虞後代之譏其不興也碑之空無字處覩聖俞記樂理

國而下四人同游鑱刻尤精僕意古帝王祀天神紀功德于此當時尊

美甚盛後之君子不必廢之壞之也又尋韓文公所謂石室者因詣盡

東峯頂既而與諸君議欲見誦法華經汪僧永叔言聖俞嘗言斯人之

鄙恐不足牽損大雅僕強諸君往焉自峻極東南緣險而徑下三四里

法華者栖若室中形貌土木也飲食猿鳥也叩厥真旨則軟語善答不可具道所切當云古之人念念在定慧何由雜今之人念念在散亂何由定師魯永叔扶道貶異最爲辯士不覺心醉色作欽歎忘返共恨聖俞繆斥也是夕宿頂上會旣望天無纖翳萬里在日子聰疑去月差近令人浩然絕世間慮盤桓三清露下直覺冷透骨髮羸體將不堪可方卽舍張燭具饌相與岸幘帶環坐滿引賦詩談道間以謔劇然不知形骸之累利欲之萌爲何物也明日訪歸路步履無苦午間至中院申刻出登封西門道潁陽宿金店十六日晨發據鞍縱望太室猶在後雖曲南西則但見少室若夫觀少室之美非由茲路則不能盡諸邑人謂之冠子山正得其狀自是行七十里出潁陽北門訪石堂山紫雲洞卽邢和璞著書之所山徑極峻捫蘿而上七八里上有大洞陰數畝水泉出焉久爲道士所占爨煙熏燎甚瀆真境已戒邑宰徒而出之此間峯勢危絕大抵相向如巧者爲之又峭壁有若四字云神清之洞體法雄妙蓋薛老峰之比諸君疑古苔蘚自成文又意造化者筆焉問道士及

近民皆曰向無此異不知也會將雨而去猶冒夜行二十五里馬上粗苦疲厭則有師魯語恠永叔子聰歌俚調幾道吹洞簫往往一笑絕倒豈知道路之短長也十七日宿彭婆鎮遂緣伊流陟香山上上方飲于八節灘上始自峻極中院未及此凡題名于壁于石于樹間者蓋十有四處大凡出東門極東而南自長夏門入繞崧轅一匝四百里可謂窮極勝覽矣今旣還府恐相次便有塵事侵汨故急寫此奉報庶代一夕之談

**明周叙游嵩陽記**宣德丙午三月予在鞏祀宋陵畢瞻望嵩少諸山慨

然想其勝與廣文吳遜志約游不果行越二日遂携邑庠諸生同往行三十五里至黑石渡沿洛陽南上河水清駛水濱山石犖确下步行二里餘午食又行半舍許地曰漫流岡上有郭汾陽廟環廟古栢數百株蒼翠蔚然可愛有二碑其一金元光二年前上黨趙琢撰云汾陽嘗領兵清河朔至是索芻粟里人告以是邦西南岡嘗出毒霧爲災故田穀不秋無以供餉汾陽乃旋軍登其上以壓之毒因以息里人遂立廟祀之

相傳祠下有洞時有聲隆隆然蓋毒霧所出處予惟古人稱掃清氛侵汾陽之謂矣一則緱山陳老人所題必宋元顯者而逸其名夜宿原良村翌旦遵趙城陟轅轅道石徑崎嶇盤迴以上中有關名寧嶺老卒數人守之轉西五里入少林寺竹木蔽翳仰不見日花草香郁郁襲人寺在五乳峯麓少室山當其南隱若屏列寺佛殿後爲講堂堂後有立雪亭則佛徒惠可受法於達磨處惠可嘗侍達磨雪深至腰不去竟得其法予因歎曰昔游定夫楊中立立雪於程門卒傳其道惠可學佛法亦然使世之爲弟子皆若此其學詎有不成者耶因觀歷代碑刻其文最舊則有梁武帝御製達磨太師贊餘皆唐宋以下文字又向西北循山厓深入三里許攀援而上山勢岬然環抱視寺之臺殿山之林壑若在席下是爲達磨面壁菴菴有石影云達磨面壁九年之遺跡也時雨止雲收煙霧澄霽幽鳥玄蟬鳴聲上下翛然有塵外之想僧云西南八里巔有惠可菴有卓錫泉以榛莽蒙翳不果上飯畢啓行逾十里則高山少室東西對屹山色掩映蒼翠如滴路循深澗灘石礧礧按轡徐行毛髮

森豎俄經一小土神祠南忽有赤衣童子疾趨道左令導途者索之彌久不見竊自念曰連月旱暵而赤色者南方朱火之象也是豈旱魃之流歟因名其地曰赤童子山又行十里憇郵亭中亭後一里有寺名會善刻元雪菴所書茶榜字徑三寸許迺偉可觀晚至登封假館學宮自原良至是又六十里明日謁中嶽祠祠在縣東八里高山之陽中原壤地平曠有山亦培塿不崎嶇唯嵩山蜿蜒磅礴騎奔雲轟綿長數十里屹然在天地之中諸山環列勢若星拱蓋乾坤秀粹所鍾宜神靈之宅也祠規制極宏壯峻極殿南爲降神殿三面皆圖中甫像丹青剝落而筆意蒼古宋金以來石刻以百數惟王曾奉勅撰者碑最穿壯字體雖甚勁麗文漫滅不可讀丈室後有竹數百竿微風度之鏗然有聲如擊金石此又洛中之僅見也又明日循北門游嵩陽觀觀久廢惟古栢三株存大者圍幾三丈高兩倍之相傳漢武帝封爲大將軍有石刻識其下次者亦幾二丈圍封次將軍望之如張幃幄擁車蓋風動又聞如絲竹之音相對倚久之不能去前有天寶三載紀聖德感應碑高大異常

制書法極妙又從東度涸澗尋崇福宮卽太乙觀林深從者迷失道往  
返數四始達宮亦屢廢惟三清殿存亦至元間重修者旁屋近燬于野  
火道宮依殿以居舊有奕棋檣蒲泛觴三亭今惟九曲池存有泉名太  
乙歲久亦湮則泛觴亭之故址也二宮觀俱漢唐宋以來天子巡幸暨  
王公卿士宴游之所想其珠宮琳館金碧交映今則荒煙斷礎鞠爲丘  
墟樵人牧豎得而辱焉此豈非物之興廢有時雖方外有不得免者乎  
升高以望遠則箕穎諸山隱然如畫追想巢由之高風西則少室三十  
六峯綺結繡錯高插霄漢深悲李山人之陳迹目與景接心契神會超  
然若御灑氣游鴻濛而不知其所止也稍東有啓母石云塗山氏所化  
其說恠誕不經極西有法王寺亦名刹殿宇頽圯惟浮屠巍然南下則  
有周公測影觀星二臺廢址北顧嵩高二十四峯舒竒獻秀歷歷可指  
並山頂而東則又有所謂盧鴻巖投龍洞皆嵩陽勝處擬次日往游是  
夕冒風寒不憚遂不果顧予先後所賞者其所得亦可謂富矣

明都楊游嵩山記 癸酉十一月朔予至洛陽欲圖嵩山之游二日至偃

師縣三日自偃師沿洛河南行五里渡河十里登唐廬陵王墓石表猶  
存中一碑高大字漫滅不可讀二十里至寧嶺口兩山對峙巖道崎嶇  
乃唐高宗幸少林寺時所鑿山行八里至少林寺特少室山北麓有碑  
後魏孝文爲胡僧跋陀建者唐太宗爲秦王時賜寺僧教有云王世克  
叨竊非據敢違天常法師等並能深悟幾變早識妙因擒彼兇孽廓茲  
淨土聞以欣尚不可思議今東都危急旦夕殄除並宜勉終茂功以垂  
令範蓋當時寺僧之立功者十有三人惟曇宗授大將軍其餘不欲受  
官賜地四十頃此可補唐書之缺少林僧至今以武勇聞所從來遠矣  
寺佛殿後爲講堂堂後左有立雪亭昔僧惠可嘗侍達磨雪深至腰不  
去卒嗣其法今僧中稱爲二祖出西廊百步有甘露臺胡僧跋陀於此  
翻經天降甘露故名西北上山二里至達磨菴殿前有六祖手植栢又  
上一室門外石刻達磨面壁之菴六大字宋蔡汴書室中塑達磨像案  
前石高僅二尺廣半之達磨之形宛然其上拭之益顯蓋菴之上四里  
有達磨洞茲石乃其九年所面者古謂精神可通金石諒哉回至方丈

寺僧文載言經閣後有古槐往視之其高十丈圍三十尺文載復誦文潞公游寺詩有五品封槐今尚在之句則其壽可知第未知封自何時也出寺東行十五里折而東北三里至戒壇寺破屋三楹中四碑刻元學士李溥光所書茶榜字徑四寸適偉可愛又旁有唐大曆二年勅戒壇碑寺左百步爲會善寺法堂中有後周嵩陽寺碑後刻云大唐麟德元年移植於此可謂吉矣佛殿東偏有泉出自山中惟供寺僧之汲通之俾資灌溉則伏而不流僧云相傳唐有高僧晏公於此誦法華經龍作人來聽晏知其龍也告以寺乏水遂送此泉東南行時有飛雪十里至登封雪乃大作庚午雪霽東行嵩山近目雪蒙其顛如玉田礪樹復相帶映其清逼人恨無工畫者如范寬輩以圖之耳八里至嵩山神祠祠在黃蓋峯下蓋高山巍然中國之中其周幾二百里羣山拱列有類兒曹宜其秀鍾靈聚爲五嶽之尊而黃蓋一峯在山東南盡處其宅神靈尤宜祀之外有亭扁曰草叅過客憚於入謁多展拜於此入門三重咸有古栢或喬或偃或俯或欹或屈而蟠或怒而攬或奮而欲騰又或

如帷蓋之張幾二百株三門內左右列四嶽祠又有降神殿壁繪古甫申像歲久剝落謁嶽神殿西爲御祠祠多歷代碑刻南行二里折而東北又二里北麓入盧巖寺蓋唐盧鴻隱處後爲僧廬其上四里有盧巖上寺聞石壁飛瀑數丈視此殊勝路陡雪深竟莫能至辛未登封北三里至嵩陽廢觀其中所存唯唐李林甫觀記元五祖堂記二碑及三古栢栢之高皆不逾三丈大可六人圍舊有石刻云漢武帝封大將軍其次亦可四人圍道士云此次將軍也皆形狀恠甚不可圖繪夫漢武迄今千七百年栢在當時已受封殆殷周時物邪其又次亦可三圍予平生見古栢多矣若二封栢獨蓋出天下之壽木亦奇矣哉又東三里據山陽爲崇福宮其後名萬歲山昔漢武臨幸聞空中呼萬歲者三因卽其地建萬歲觀唐更名太乙宋於此奉安真宗御容設提舉管勾以祝釐中故有奕棋檁蒲泛觴三亭今唯存泛觴石予命道士引泉委曲流之立飲其上而寒風砭人數杯卽罷下山東行一里觀啓母石石旁之祠及唐崔融碑今皆不存按啓母石事見淮南子其說不經後之人蓋

嘗辯之

明喬宇游嵩山記辛卯秋八月予歸自京口取道爲嵩嶽之游道出亳州州人薛君采來迂予往官吏部時君采嘗爲郎屬因拉之同行九月丁巳抵登封縣戊午謁中嶽廟廟在黃蓋峯下去縣東八里謁退觀歷代碑刻中一斷碑八分書也字畫勁美類唐徐浩書餘碑約五六十皆宋元金并我朝所樹者出廟東北行二里爲盧巖蓋唐盧鴻隱處下又五里爲盧巖寺自下寺至此崖谷幽邃竹樹陰翳嵩少之佳處也寺後有瀑布泉尤爲殊勝泉出巖頂下瀉石壁長踰數百尺濶止尺餘寺僧云泉舊濶二三丈今歲旱泉勢頓減然卽所見已奇麗正德庚午予奉命祭山東沂山亦有二瀑布泉形致相類並北方名泉也已未出啓嵩門北行八里游崇福宮又二里次山下自此山行路詰曲循諸峯而西皆陁絕行十五六里經西流泉山氣凄冽水已寸許厚又四五里至白鶴觀觀去絕頂尚二三里時日已將晏上造北極廟蓋嶽之絕頂廟側有玉井冬夏不竭始予入登封境遠望嵩嶽未知嶽之高也至山麓所見猶然比登絕頂四顧羣山拱列于下北眺大河迤邐而東然後知嶽之崇高也君采素清臞至觀前已疲甚不能絕頂予歸顧而笑曰若輸我一籌矣歸抵縣已二鼓庚申復由啓嵩門西北行五里至嵩陽宮觀三將軍栢其最大者盈六圍相傳漢武帝所封在漢已爲鉅木其壽遠矣歷年久狀特奇恠予往歲代祀平陽媧皇廟廟有古木與此栢伯仲意天下之木殆未有甲於二木者午後至少林寺宿焉翌日游初祖菴菴在寺後林壑之美倍於盧巖自菴後陟五乳峯卽少室之別峯行十餘里始至峯頂有達磨面壁洞下望諸山宏闊不逮嵩嶽而攢叢映帶亦少室諸峯之冠云壬戌出少林過嶠嶺口渡伊洛水抵偃師世嘗謂徧游五嶽爲物外之福予素愛山水不減昔人而游山之福似爲過之恒泰華三嶽往歲皆嘗寓目自餘名山如句曲清涼之屬非五嶽列者尚不與焉今老矣復得歷覽嵩嶽之勝五嶽中獨未歷衡嶽耳昔賢有缺陷世界之語謂人間之福不宜備享况物外之福可盡取乎由是言之予阿堵中雖欠祝融諸峯未爲不可也

唐楊炯少室山少姨廟碑臣聞崑閩西北之天門也則五帝處其陽陸

三皇居其正地太山東南之日觀也則秦皇刻其石銘漢帝採其玉策故知建都邑正方位畫崇墉剡濬洫必憑天地之險然後四海爲家擁神休尊明號協時日同量衡必致山川之祠然後羣神受職少室山者山嶽之神秀也憑河圖而括地用遁甲而開山發揮宇宙之精噴薄陰陽之氣壁立而千仞削成而四方北臨恒碣猶如聚米南望荆衡纔同覆篑共工觸皇天之八柱未足擬議龍伯釣溟海之三山無階想像考於含神紐白玉猶存驗於山海經黃花不落其名有序則大室西偏其位可知則高高佐命若乃乾坤之所合雷雨之所交仰躔七星之野俯鎮三河之曲朝市臨於域中樞機正於天下六合交會於是乎有天帝之下都九州名山於是乎有靈仙之窟宅臣謹按少姨廟者則漢書地理志崇高少室之廟也其神爲婦人像者則故老相傳云啓母塗山之妹也昔者生於石紐水土所以致其功娶于塗山室家所以成其德后宗之位象南宮之一星外戚之班比西京之列傳惟幾不測其道無方騁神變而揮霍降精靈而盼饗亦有蔣侯三妹青溪之軌跡可尋虞帝二妃湘水之波瀾未歇何止祠稱下婦廟號滕姑少女宅於西宮夫人館於南嶽山臨白岸空聞石室之靈浦對青崖獨有金臺之異若斯而已矣

晉石崇游金谷序予以元康六年從太僕卿出爲使持節監青徐諸軍事征虜將軍有別廬在河南縣界金谷澗中或高或下有清泉茂林衆果竹栢藥草之屬莫不畢備又有水碓魚池土窟其爲娛目歡心之物備矣時征西大將軍祭酒王詡當還長安余與衆賓共送往澗中晝夜游宴屢遷共坐或登高臨下或列坐水次時琴瑟笙筑合載車中道路並作及住令鼓吹迭奏遂各賦詩以叙中懷或不能者罰酒三斗感性命之不永懼凋落之無期故列序時人官號姓名年紀又寫詩著後後之好事者其覽之哉

唐薛曜游瑛石淙山詩序

夫圓嶠方壺涉滄波而歷際金臺玉室履玄圃而無階唯聞山海之經空覽神仙之記爰有石淙者卽平樂澗也爾



其近接高嶺俯屆箕峯瞻少室兮若連踈潁水兮如帶旣而躡崎嶇之  
山徑蔭蒙密之藤蘿洶湧洪湍落虛潭而送響嵯峨羣壁列幽澗而開  
筵密樹帷屏舒朱明之景象長松傘蓋引清吹之時涼就林藪而憚寸  
心對煙霞而滌塵累幽壟巨壑卽是桃源深澗平流還浮竹箭網薜荔  
而成帳聳蓮石而如樓洞口齊分瀟千年之石髓山腰半折吐十里之  
香粳無煩崑閩之游自然形勢之所祈題綵翰交寫瓊篇庶無滯於幽  
棲冀不孤於泉石各題四韻咸賦七言詩曰洞口仙巖類削成泉香石  
冷盡含清龍旂畫跡中天下鳳輦披雲此地迎樹作帷屏陽景翳芝如  
宮闕夏涼生今朝出豫臨玄圃明日陪游向赤城

**明都穆游王屋山記**書禹貢曰砥柱析城至於王屋今王屋山在河南  
濟源縣西八十里山形如王者車蓋其中有小有洞爲天下第一洞天  
歲癸酉仲冬予至濟源欲往游焉出縣西三里經濟瀆祠入謁大濟之  
神其殿北有北海神殿咸著祀典北海殿前有池周七百步其西一池  
周與之等而中通焉卽濟水所聚蓋其源出自王屋天壇之巔伏流百

里至此復見東南合流至溫縣號公臺入於河禹貢曰導沇水東流爲  
濟是也東池俗傳能出物以應人之求然卒始於三月至四月望而止  
餘月則否予友潘黃門希召舊爲懷慶理官作文辯之謂春夏之交泉  
脉騰沸而濟尤勁疾物隨沸而上予嘗爲作序是日默禱於神願出物  
以彰靈異久之物竟不能出始信希召之辨足以破紛紛之惑也出祠  
南行三里折而西四十里午食自此登秦嶺二十里至澗河宿野人家  
十四日早行二十里至陽臺宮宮在王屋南麓八僊岡上爲唐司馬子  
微修仙之所宋徽宗嘗游幸其中天尊殿壁繪神仙龍鶴雲氣升降輦  
節羽儀之屬甚奇蓋開元中人筆殿左有唐大中八年碑上刻睿宗與  
子微書并送還天台詩宮之東三百步有後晉燕真人井其上有洗參  
石槽相傳燕於此得道上昇宮北上一里經山神祠三里觀仙猫洞人  
云燕真人丹成雞犬俱昇仙猫獨畱不去人就洞呼仙哥時或有應者  
二里涉不老泉又二里至李道人菴道人山西高平人弱冠時以母病  
登天壇舍身崖舍身以祈其愈予詰之答云初墮時但知行清化鎮上

鎮在河內縣去忽有龜蛇左右相逼始知墮崖則已坐深谷中肢體無損凡四晝夜罔知饑渴天壇老道士聞其舍身覓而得之時隆寒俾之附火右足悉墮其趾自是母病亦愈遂結菴山中其事誠異矣五里上紫微宮至此已及山半羣山環坐積雪猶在予心目豁然道士有陳性常者爲吾鄉人延之共飲性常舊住武當山之自然菴今年七十有八而神氣清茂似有道者移居茲山已二十年其學乃仙人張三丰之再傳爲予言張師名玄玄遼陽人自號三丰遊叟世人因其號第稱之曰三丰而鮮知其名正統間猶在後不知所之予曰人傳三丰爲陝右之寶雞人何也性常曰寶雞張師蓋嘗寓之非彼產也飲畢宮西半里至望仙坡性常草菴小坐北折緣險一里閱玉泉泉爲方井上刻石云玉泉聖水旱澇如故山中道士多汲以供食飲仰視天壇去此尚十八里路陁隘且多積雪左右澗壑不可丈尺足未陟而氣已奪惟神游而已予問道士小有洞所在云在山之垂簷峯下元季鄉民避兵者多穢其中自是洞口遂塞今不知其處夜宿陽臺十五日復還濟源

明喬宇游王屋山記嘉靖辛卯秋九月丙寅予出濟源祠折西行四十二里登秦嶺二十里過澗河村二十里至王屋村宿焉丁卯昧爽行二十里至陽臺宮宮在王屋南麓八仙岡上爲唐司馬子微修仙之所有碑刻唐睿宗與子微書并詩宋徽宗亦嘗幸其地中有天尊殿壁繪神仙龍鶴雲飛升降輦節羽儀之屬甚奇蓋開元中人筆宮之東百步許有洗參石槽相傳燕真人于此得仙藥異參遂成辟穀之道北上一里經山神祠三里觀仙猫洞傳云燕真人丹成雞犬俱昇仙獨猫畱不去二里涉不老泉路漸峻絕确犖側仄又三里至李道人庵道人曾以母病捨身墮崖而不死後母病愈遂結茅以居又五里上紫微宮羣山環繞崔巍屹峙至此已及山半天氣澄霽遂杖策由宮西半里至望仙坡少折里許有泉刻曰玉泉聖水旱澇不竭諸觀之飲皆合焉北上路甚險絕十里餘至燕真人升仙石石臨西崖石上有大小足跡六俯視羣峯綿亘千里令人有羽駕躋雲之意轉東北行三里入南天門石磴攀援上一里至絕頂頂上有北極諸殿瓦皆銅鍊鑄成殿前有石壇幅員百

丈壇三級壇上有玉皇閣黃琉璃爲之高丈許予題曰白巖來壇下覆  
小有洞口據福地記小有洞周回一萬里曰清虛之天北望山後千巖  
萬壑岩堯壘翠時日將夕遂由南天門而下宿紫微宮厥明戊辰陰晦  
霧靄不復見天壇之巔道人云天壇嘗陰晦登者多不獲予聞之自詫  
其異紀之以詩復篆天下第一洞天于宮

**明李濂游王屋山記**王屋山在濟源縣西百里禹貢曰底柱析城至于  
王屋是也以其山形如王者車蓋故名或曰山伏如屋也又曰山空其  
中列僊宅之其內廣濶如王者之宮也按龜山白玉上經暨茅君內傳  
皆云大天之內有玄中洞三十六第一曰王屋之洞周回萬里名清虛  
小有之天杜甫詩憶昔北尋小有洞卽此山也其絕頂曰天壇常有雲  
氣覆之輪囷紛郁雷雨在下飛鳥視其背相傳自古僊靈朝會之所世  
人謂之西頂蓋以武當山爲南頂泰山爲東頂而並稱三頂云余夙慕  
天壇王屋之勝顧塵事羈縛恒以未獲一游爲憾歲己三月十三日乙  
亥蚤起渡河往游是夕宿原武翌日丙子宿武陟丁丑宿覃懷戊寅宿

濟源己卯晨出縣城西走溝中四十里飯胡嶺又折西南行十五里度  
秦嶺皆行山上逾五里至劔河堡南行又折西北行十五里至陽臺宮  
在王屋山之麓唐司馬承禎修真之所也明皇御書寥陽殿三巨字殿  
中塑吳天上帝像旁侍十二元辰皆偉麗而白雲道院乃在寥陽殿之  
東曰白雲者承禎別號也入道院見大鑊一徑丈深數尺勝國時物也  
宮之南有八仙嶺其勢如八仙飭冠佩下天拱揖而嚮陽臺又有仙貓  
洞不老泉皆去宮不遠出陽臺宮東北行下山百余武謁煙蘿子祠祠  
前有洗參井祠卽煙蘿子宅址也煙蘿子者晉天福間人世傳煙蘿子  
佃陽臺宮田苦積功行忽一日於山中得異參闔家食之按宅上昇云  
過祠北行磡道中寨亂藤履危石東西兩山壁立千仞風驟起巖谷  
林木間令人震恐磡道中行八里復上山坂壘巖盤曲莫計層數乃循  
石磴道士導引入紫微宮仰視臺殿如在天上睚金書榜曰王屋山朝  
真門門內爲天王殿榜曰天下第一洞天又上一層曰三清殿面對華  
蓋山如几案然又上一層曰通明殿設昊天上帝像殿中環列朱龕貯

國朝御賜道藏經若干函有碑數十通皆宋金元時物薄暮酌方丈之  
松菊堂翌日庚辰夙興爲天壇絕頂之游乃乘小山轎僕夫持繩牽輿  
以上出紫微宮西上二里至望仙坡閱披雲子修煉之跡又上四里至  
憇息亭凡登絕頂者至此必飲茗少憇故名其地有仰天池四面高而  
中凹舊有泉今涸至此則山徑愈峻險轆不可行乃步以上過此則躡  
瘦龍嶺登一天門曰瘦龍者以山脊之瘦如瘦龍露骨也過一天門登  
十八盤山石壁陡絕旋繞而上至躡雲嶠觀煙蘿子登仙石石上有足  
跡下有澗曰避秦溝又稍上則紫金巖巖之右有三官洞洞前有仙人  
橋少頃至南天門則愈陡絕手攀鐵索以上觀軒轅黃帝御愛松小憇  
換衣亭謁玉皇殿殿之東曰清風臺西曰明月臺皆巨石也又行數十  
武至絕頂入虛皇觀謁軒轅廟真君祠乃陟三級瑤臺極其遐覽東曰  
日精峯日始出時晶彩爛然西曰月華峯月上時光華先見也於是東  
望海岱西眺崑丘北顧析城南俯黃河如線如嵩山少室隔河對峙咸  
聚目前下視華蓋諸山卑如培塿竊意天下奇觀無踰此者余徘徊久

之乃下三級瑤臺徧觀古今諸石刻而日已晡矣是夕宿上方院偶思  
李白詩願隨夫子天壇上間與仙人掃落花之句超然有遺世獨立之  
心焉余入寢室將就枕道士走報請觀天燈亟出視之則見遠火如流  
星下上明滅杳無定跡時從行者咸相顧駭異辛巳昧爽起觀日始出  
之景甚奇天旣明陰雲蔽翳移時頃之開霽步至阼門見古松十數株  
夭矯如虬龍環列成行儼如侍衛皆千百年物也遂觀捨身崖志心石  
在東北虛巖之上突出一石濶尺許長丈餘勢欲飛墜下瞰峭壑神悸  
股栗又觀老子煉丹池池上有老子祠古碑存焉聞東北有王母洞與  
邃莫測人跡罕至元歲時投金龍玉簡于此余欲往游之道士曰徑險  
不可行且有蛇虎潛其中乃下南天門一里許游黑龍洞洞前有太乙  
泉一曰太乙池蓋濟水發源處也世傳析城之山升白氣于天落五斗  
峯化爲濕雲自石竇中滴水降太乙池云道士曰每歲諸元會日五更  
之初輒聞仙鍾自遠洞中發聲悠揚清婉可聽又曰日出沒時間有倒  
影之異余暫游速返悉未之逢也是日繇舊途下山仍宿紫微宮曩余

嘗夢游一山極奇絕嗣後游四方名山無似者乃今登覽王屋種種與夢中所見合夫豈偶然者哉

**明李濂游明月山記**太行之陽丹水之東有山焉曰明月山蓋太行之支峯也層巒疊障聳峙于後而左右迴抱宛如城闕有寺巋然在山之半者曰明月寺也余西游天壇還乃繇清化鎮西行至五里堡折北行七里許至山神廟始躡明月山之麓石逕兩旁羅雜樹悉桑柘青楊胡桃諸木時三月垂盡櫻桃滿山谷纍纍然如糾珠赤幾摘之可食值微雨初霽塵歛宇清心神怡悅自山麓仰登三里許苔磴逶迤盤轉而上歷峻坂抵稍平處則金剛殿再陟則天王殿又再陟則水陸殿殿之前有旱蓮花生石罅中六七月開階砌之右有連環雙井味甚清冽又再陟則藏經殿西則蒼公洞洞方一丈有天平石光瑩如碧玉蒼公者寺之游僧也嘗居是洞又再陟則觀音閣高逼霄漢可舒遠眺閣之東峯下有課蜜泉正德初河南提學副使歷城王公勅所鑿水甘美至朝聚羣蜂吮之故名云閣之西有祖師堂塑五僧像實開山以來有名德者空相廣恩古峯蒼公雲峯也余見寺山皆古栢無它木恠問其故老僧曰元泰定中空相始創茲寺以泥丸栢子持彈諸巖谷今蒼鬱成林障蔽天日者皆泥丸栢也寺舊名明月天順戊寅賜額曰寶光寺而寺僧數十人咸以織麻履爲業依巖傍阜花竹環擁佛宮僧寮分據幽勝而寺之前後諸巨石如伏犀馴象不可狎翫寔爲覃懷佳境云李子曰邇余之游天壇也見御賜道藏經茲游明月則又見御賜佛藏經余汴人也汴中諸寺觀二經皆散佚零落不可讀嘗有志印購欲徧覽焉顧力未能耳期以數年之間賤軀強健擬齋糧渡河重游福地讀道藏於天壇讀佛藏于明月讀竟而後返用償夙昔之願然未知果能終遂焉否也

**明李濂游百家巖記**太行轟轟數千里雄跨河北諸郡而山之所至隨地得名其實皆太行也修武之北五十里有曰百家巖者以巖首稍平可容百家也嘉靖乙巳春三月余下天壇旋軫取道修武往觀百家巖之勝乃繇馬坊村並山北走度岡嶺數重失道入灌莽中遇樵翁指示

小徑草樹蒙密攀緣以上石路歎又愈進愈峻至其處則見飛峯疊巖懸崖峭壑連亘起伏若迎若送若拱若揖若拒若闔堆蒼積翠煙霏冥濛不可勝窮太行穠秀此當爲冠而叢林崇明寺寔據其勝土人謂之百家巖寺創于高齊唐稠禪師益拓大之臺殿寮宇咸壯麗乃若冷然自山而下濺濺有聲穿佛殿之礎流入僧厨者玉女泉也一泓湛然影沉沉紺寒在佛殿之後者明月池也朱欄碧牖當池之陽四面敞豁可凭可眺者環翠亭也慕佛殿之西有石如砥可坐而飲面對瀑布泉如千丈珠簾噴水灑雪涼氣颼颼侵入肌骨者劉伶醒酒臺也臺下有池方廣踰數丈泉出其中四時不涸者稽康淬劍池也宋嘉定四年河北提刑曹涇楷書醒酒臺淬劍池六巨字刻石上而鍛竈乃在淬劍池之畔云繇醒酒臺而上廢址宛然有磴可躡者避暑樓也相傳漢獻帝爲山陽公時嘗避暑于此瀑布泉之旁有稠禪師菴菴左多生龍鬚草凡禱雨者率采之以塞瓶口它山所無也巖上有二洞千佛洞在稠禪師菴西而觀音洞乃在玉女泉下皆空邃可居也王烈泉直在伽藍殿後絕壁上烈遇石髓于此也寺中有斷碑數十皆剝落不可讀所可見者唐杜鴻漸元張琬二碑王暉馬子安數絕句也風景殊絕徘徊忘歸漫志其槩以貽好事者

明李濟游白茅寺記

下百家巖並太行之麓東北行三十里至白鹿山

山之半稍西南一里許有寺曰白茅一曰白雲泉壑清曠林木蒼蔚蓋太行諸寺之最佳者始余之西游也友人謂余曰必游白茅至則丹崖翠壁環峙前後恠石奇柏豁撐拄而三鳳嶺參差翔舞若自天而下抱寺之左右而止焉繇山之麓抵寺凡三里余攀援而上足罷力勸遇稍平處輒坐憩石上僧持茗來迂啜茗畢乃手拊僧背努力盡石磴入寺竹樹陰合弗見天日佛殿凡五層而水陸殿獨在絕頂壁畫諸天像頗工緻稍折而西有二泉皆平地湧出左曰金沙右曰銀沙各取沙之肖像名之二泉交滙于池潏然奔流下灌園中蔬泉上有二紫荆樹土人呼曰百日紅泉之後石梯數十級褰裳以陟至石臺臺上有地藏王殿又西磴石崖有窟昏然曰青龍洞洞內有水色正黑悽神寒骨寺之

東園中有宋大中祥符二年所建五百羅漢碑今無一存者余聞是寺在弘治正德間最盛僧徒至百餘人人士來游者供帳甚欸比歲困於賦役乃毀室廬鬻鐘磬以給逋負坐是廢禪輟唄遠望皂衣者至咸走匿深谷中余偶來游傷其事聊記之寺壁倘司牧者見而有槩于中庶或濟之亦仁政也

**明李濂游石門潭記** 出白茅寺東北行二十餘里至石門山曰石門者兩山壁立相拒如門也石門下有三潭方廣踰二十畝淵深不可測水皆黛色能興雲雨蓋蛟龍之所宮也首二潭居山上有水無魚而三潭獨在下中有神魚千百頭觀者弗敢侮或投之石礫則風雷隨作因憶歐陽公畱守西京日嘗與推官梅聖俞登嵩頂至武后封禪處見有石記戒人游龍潭者勿妄語笑以瀆神龍龍怒則有雷與此正同也余立三潭上命從者撻金伐鼓羣魚咸出浮水面大者長丈餘小者尺許俱黃金色乃戲屑餅餌潭中羣魚爭鼓鬣仰吞往來翕聚忽爾沉逝甚可樂也三潭上有三龕古列仙所居語曰上有三龕下有潭而三仙

廟乃在山之深與處塑像三女仙道冠霞帔土人以為雨神歲旱禱輒應石門東有峯曰掛鏡臺相傳雲蔽掛鏡臺必大雨余游石門潭窈林絕澗曠邃閒寥又值西日下崦嵫景色悄愴不能久畱也乃促從者回轅趨共城

**明李濂游百泉記** 詩曰恣彼泉水亦流于淇又曰源泉在左斯蓋謂共城之百泉實衛源云共城西北七里有蘇門山一曰百門山乃百泉始出之山其地巖谷幽邃林樾茂密古名士多卜居焉今歲暮春膏車西邁逾二日止百泉書院肅謁先師像遂登蘇門徘徊嘯臺慨焉懷孫登之為人史稱登居蘇門土窟中好讀易常撫一弦琴阮籍往候之與言終不答退至山半聞山巔有聲若鸞鳳乃登嘯也稽康從之三年不言臨別康強之言登曰火生而有光而不用其光人生而有才而不用其才故用光在乎得薪所以保其耀用才在乎識真所以全其年味斯言也其善體易者仙人巖在蘇門有仙人足跡巖石上刻曰仙人跡下嘯臺迤邐西轉約里半許至康節安樂窩拜其遺像康節范陽人幼從父

古徙共城遂築室百泉之上名其所居曰安樂窩布裘蔬食躬爨以養  
 父而李之才適攝共城令遂授以數學後人于此建祠專祀云出窩東  
 行南下入三仙洞內塑丘劉譚三真人像乃其修真處也或以是為登  
 舊居之土窟誤矣降洞游集仙資福宮寔書院之左鄰乃蔡氏園址也  
 而院西墻下有古白楊樹十四株大可蔽牛蓋數百年物也過院為思  
 親亭在蘇門之麓許師可為衛輝路總管以其父魯齋嘗寓共城思之  
 為立亭調為衛源廟廟世稱靈源公殿曰清輝郡邑之得名曰輝以此  
 宋元皆封王至洪武初釐正祀典改稱衛源之神禱雨輒應廟中碑刻  
 具載唐宋以來褒封之典近廟有湧金亭泉仰出縷縷千萬窠滙為巨  
 池池方廣一頃餘水泠泠澄白日照之如金故名中有菰蒲荇藻魚蟹  
 之饒亭正壁有蘇東坡書蘇門山湧金門六大字且多宋元來名士題  
 詠埒湧金翼然而相對者噴玉亭也亭中有石碣刻靈源二大字即俗  
 所謂聖井者而看花樓乃在湧金亭南池水中盛夏蓮荷芬郁翠色上  
 浮扶踈葱蒨今改為穠翠亭亭左曰洗心亭右曰雲橋寔為中流勝槩  
 薄暮移酌穠翠亭坐聞棹歌漁唱于蒹葭洲渚之間而泉流觸石怒響  
 作噌吰鏗鎔之聲晝夜不絕余倚闌四顧波光接天沙鷗水鳥飛鳴下  
 上者殆不可數時春雨初晴岸花雜吐酒酣起舞逸興浩發於是援筆  
 賦詩書諸亭上而又為記以紀一時勝游云

明李濂游三湖記

人有言曰河北多名山而莫勝於輝縣中三湖皆邃

奧尤莫勝於中湖余慕三湖久矣今年春始克來遊聿償夙願云輝縣  
 西北七十里曰侯趙川四面崇山截業中悉平疇煙林村墟雞犬相應  
 蓋彷彿桃源焉相傳古時避兵者居此實四塞險阻之區也侯趙川有  
 水北流土人呼為北流河或者乃謂無水誤矣然游者歛侯趙川必過  
 十八盤山而山極危峻石磴反隘盤旋而上如登天然遇不可輿處則  
 徒步行僕夫牽曳以上俯瞰兩崖頗深峭視諸天壇之十八盤山差為  
 易上余晨出百泉書院過午始抵侯趙川頃之至中湖寺巖谷幽窈倚  
 崖叢竹數萬竿翠陰蔽日涼颼瑟瑟雖盛夏亭午暑氣不到余坐其下  
 聞竹音如笙簫竽籟心神蕭爽寺中有石鏡半規往聞能照山河人物



之影俗稱透靈碑余諦觀之殊昏闇與常石等僧曰昔有一上官見此石異之昇以歸至盤山忽昏闇無所見乃復送至寺云南湖至中湖僅三里北湖則倍之濶大宏敞視中湖寺咸弗及乃若各當一峯之奇有泉有竹則三寺同耳余徧游三湖昏黑不能返宿中湖寺是夕風起撼林木獵獵如秋聲卧不成寐乃秉燭起坐賦詩四章曩正德戊辰北郡李公夢陽嘗往遊三湖歸爲余言中湖之盛僧徒數百人距今三十年矣僧死徙殆盡存者僅五六人余怪問其故則知其毒於賦役而至此極也余聞而悲之

明李廉游龍潭記龍潭在濟源縣西五里去瀆廟僅二里余謁瀆廟畢寓天慶宮將游龍潭出宮稍西見沙村水寺瀟灑可愛檜栢菰蒲參差掩映孤塔秀聳有雙鶴巢其巔而所謂龍潭者實在寺前潭濶一頃餘渟渟清澈可鑒毛髮舊跨潭建涵虛閣今廢居人曰潭中有神物有時涸水將至也夜輒聞蛙鳴水鳥盤旋其上弗去人以爲異云宋盛時蜀人陳省華嘗令濟源有惠政因家于濟今城北里有夜香臺乃其妻滕

國馮太夫人焚香祝嗣所臺址尚存省華二子堯叟堯佐堯咨同讀書龍潭寺中後相繼登甲科父子四人接踵爲將相皆贈太師中書令子孫蕃茂登仕中朝而虞部員外郎知儉嘗構四令祠於寺側司馬文正公爲作記碑刻亾矣寺中古石刻最多今存者校書郎張庚所撰省華善政錄暨真宗皇帝送堯叟謝病歸詩而堯叟和章併刻碑陰續建短碣俱漫漶不可讀矣余徘徊薄暮乃移酌潭上誦堯叟水昏煙暝自成圖之句嗟嘆久之

明李廉游盤谷記盤谷在濟源縣北二十里唐李愿隱居于此昌黎韓

公有序送之而是谷遂顯名於世按韻書盤磬古通用蓋山石之安固者荀子曰國安於盤石漢文紀盤石之宗是已韓謂環兩山之間曰盤又曰隱者之所盤旋余游其處則見諸峯矗立蒼翠晻靄蔚然深秀旁視它峯多拳確插起危若飛墜而此獨平穩似此謂安固者爲是谷口有農夫數家草屋參差榆柳交蔭韓序所謂草木藂茂居民鮮少至今猶然也公之序濟源舊有石本在張端家乃貞元中縣令崔泱刻其後

書云昌黎韓愈知名士也高愿之賢故序而送之嗚呼盤谷不過太行一支山耳乃獲公一序輝映今古余又深慶夫茲山之遭也

**明李濂游齊邑雜記**乙巳暮春至齊邑齊邑者昔賢棲遲之區也出邑之北門二十里至真清觀閱丘長春所書劉海蟾入道改石刻觀前有古潭瑩澈如鏡相傳海蟾子洗丹處也又十里抵山陽城一曰濁鹿城漢獻帝之墓在焉曰禪陵魏曹丕逼帝受禪奉帝爲山陽公居此陵之東五十步有漢獻帝廟傾圮厓側正德初蜀人冷宗元爲邑令復其守陵者二戶余至其處見孤塚如阜封麓荒涼荆蔓蒙絡不勝異代黍離之感晉七賢竹林亦在茲地向子期所謂山陽舊居者也余徘徊四顧絕無一竹尋訪遺蹟得一寺寔七賢堂舊址蓋後人建堂于竹林以祀七賢者草莽中卧一斷碣隱隱有字可攷元末始改建山陽寺又曰竹林寺云七子當魏景元中政歸司馬氏時事日非懼禍及以茲地近許洛泉谷幽僻乃相率爲竹林之游以自放焉初七子之縱酒也實欲閉關沉晦冀免刑戮顧亦有弗能免者君子處世之大方其別有道乎乃若蘇門之孫公則得之矣余繇山陽迤邐至六真山訪六真修煉之迹山南有洞曰六真洞深邃窈冥不可入聞其中有數丹竈洞前舊有六真觀今廢而新河之水自六真山合黃母泉南流入吳澤陂六真者丘處機劉處玄譚處端王處一郝大通馬鈺也

**明高宇觀濟源記**辛卯歲秋九月甲子予發豫之偃師與薛子君采別二十里過北邙山山連洛陽偃師孟津綿亘四百里餘歷代陵寢纍纍荒蕪覩之慨嘆北二里許有祀夷齊廟昔二公叩馬而諫處午至孟津渡河按周武王伐紂諸侯會師渡孟津卽此河北二十里至孟縣縣卽古河陽乙丑曉西行北望太行迢遞天際隱隱在二百里之外七十里暮抵濟源丙寅出縣西五里經濟瀆祠入謁大濟之神殿北有北海神殿左右皆祀典諸碑殿前有池幅員七百步俗傳水能出物應人之求而復償之今不復有矣池北臨殿楹下水湧如沸深不可測嘗有黑魚游其中人或見之西池亦數百步而下相通據濟水源出自王屋天壇之巔伏流百里復見于此爲二池復東南合流于温縣入黃河其水性

下勁過河之南溢而爲滎或伏或見出山東濟南爲趵突泉禹貢云導  
沈水爲濟是也予以正德庚午奉 命禱雨海嶽東藩觀趵突泉求其  
源有詩以識之今余旣登嵩嶽渡黃河歷濟源蓋償夙願也

**明李濂游濟源池記** 山海經曰王屋之山灑水出焉而地理志亦曰王

屋山沈水所出灑沈聲相近蓋一水也沈水卽濟水故禹貢曰導沈水  
東流爲濟入于河溢爲滎東出于陶丘北又東至于河又東北會于汶  
入于海夫濟之爲水瑩潔如玉性下勁疾貫大河而不濁故釋名曰濟  
源也言源出河北濟河而南也余曩閱桑欽水經酈道元爲之注凡異  
常事無不具載而獨於濟水下無所稱乃知世之謂靈異者皆譌謬之  
傳也余家去濟源僅三百里數聞鄉人獻香祠下者云有借貸錢布浮  
藥以療病之事心竊疑之嘉靖乙巳春三月計當俗所謂潮賜之期乃  
單騎往觀之州縣獻香人紛逦四至晝夜叫佛聲響震林谷余聞之憮  
然歎曰無知徼福者有是哉余旣至池上肅謁濟瀆神祠祠後有北海  
神殿誌謂濟瀆源通北海故祀北海于此或曰以北海遠望而祭之也

殿前有池卽浮物之處也是謂東池池西有石橋橋之西池曰西池皆  
濟水自王屋山頂流入太乙池乃伏流地中東行九十里復見此滙爲  
二池地志謂東源周迴七百步其深不測西源周迴六百八十五步其  
深一丈合流至温縣歷號公臺西南入于河自今觀之東池卽東源周  
僅百餘步亦不甚深西池卽西源周如東池深纔三四尺耳余躬躡王  
屋山頂觀太乙池亦涸古今陵谷變遷乃爾邪正德初楚辰潘君棠理  
懷慶嘗著辨謂春夏之交泉脉騰沸升發之氣勁疾愈于常時故近投  
之物或當其衝隨沸而上此理之常無足怪者余坐水殿竟日見布帛  
桃乾浮在池面者上書姓氏年月亟取視咸三日內所投者則臯所聞  
浮出遠年之物皆妄傳也又見紙裹成藥浮出以應人求者上亦有字  
意神靈爲之必仙畫雲篆乃皆俗筆而服之者亦罔效豈廟中人欲神  
其說而故爲之邪又乞嗣者所投銀嬰兒有沉不沉者蓋銀嬰兒皆空  
中其製有滲漏者必沉否則浮如以浮沉繫之誠格他物奚不然乎潘  
氏謂果水之靈則當不擇時而施何獨見於春夏之交乎其爲水泉氣

游名山記 卷之六  
盛之所爲明矣乃若能興雲雨澤百穀見伏斷續不因餘水而能獨行  
以赴海是則濟之靈也先王列之爲瀆廟食萬世有以哉 國家定制  
惟天子得遣官祭告其歷代碑刻亦云蠢茲下民乃不遠千里混男女  
塞道塗羣蹈僭謬以僥福田自古姦人多假神以倡亂如漢末之張角  
誘結凶愚至三十六方流毒海內爲人上者可聽其貿貿而不禁其漸  
乎

**明都穆游伊闕記** 伊闕在洛陽西南三十里癸酉仲冬二十九日進士  
路君敬夫陪予往游離城五里經天津橋橋久圯石悉爲有力者取去  
今易以木二里至邵子祠卽所謂安樂窩中爲塑像瞻拜而出二十三  
里至伊闕其得名以兩巖對峙而伊水出其間俗又名龍門謂兩巖爲  
禹所鑿司馬溫公嘗辯之以爲天之所爲而禹特治之非鑿也予考之  
龍門在今山西之夏津縣乃誠禹跡則此固非矣上西巖登五龍祠沿  
厓行入潛溪寺寺皆石洞爲之蓋徧巖內外石佛大小以千萬計傳昔  
拓跋魏胡后崇佛命工所鑿與敬夫午酌出寺東行石罅時有流泉惟

稍北二泉四時常溫名溫泉二里渡伊水折而東南半里至東巖一巨  
石中裂老僧云此龍門也昔有龍自此而出鱗鬣之形宛然石上乃知  
世俗之說又似非誣蓋游人往往止於西巖間無有指示東巖者故未  
嘗見此雖溫公之辯但謂非禹所鑿則其他可知矣行六十步有石將  
墮旁畱虎跡名虎托石又十三步得鳳凰石其跡大幾一尺五爪一距  
深入石理與虎跡皆涉於異有似僞爲然予觀今之圖鳳者惟一距三  
爪未聞其爪之五使真有僞曷不效圖之形則又疑其真也敬夫曰茲  
游也得識龍門辯鳳爪皆平生之所未及願書以裨郡乘之缺遂書之

**明都穆游砥柱記** 砥柱在邠州東五十里黃河中以其形似柱故名禹  
貢謂導河東至于砥柱卽此乙卯往游砥柱離州二十里午食又二十  
里循河行十里至三門集津三門者中曰神門南曰鬼門北曰人門其  
始特一巨石而平如砥想昔河水汎濫禹鑿之爲三今水行其間聲激  
如雷而鬼門尤爲險惡舟筏一入鮮得脫者名之曰鬼宜矣三門之廣  
約二十丈其東百五十步卽砥柱崇約三丈周數丈相傳上有唐太宗

碑銘今不存蔡氏書傳以三門爲砥柱州志亦謂砥柱卽三門山皆未嘗親履其地故謬誤若此又按隋書載大業七年砥柱山崩壅河逆流數十里砥柱今屹然中流上無土木而河之廣僅如三門奚有崩摧而壅河逆流至數十里之遠蓋距河兩岸皆山意者當時或崩人遂以爲砥柱而史氏書之也孟子云盡信書不如無書有以哉

**明都穆游王喬洞記**新安有王喬洞洞在縣西二十里石皆土所成取而破之木葉之形交錯其間文理具在若雕刻者盡山石皆然洞之上二木亦皆化石而復產枝葉與凡木類予見之乃大駭以爲穹壤間之所未有使人謂予安能信今試以語人人非予亦未必不以爲妄吁何其異邪碑言昔神仙大丹之成土木皆化爲石其說似爲得之第不可與俗人道耳按王喬有三其一乃周靈王太子其一漢葉縣令其一蜀之益都人俱有仙術今未知孰是或又謂此卽爛柯山而以晉王質之事實之爛柯山在今衢州衢舊名信安豈新安之與信安聲相近而誤稱邪然此亦何足辨神仙之事在昔固有之矣

**天梯閣游天平山記**至道元年開寓湯陰未幾桂林僧惟深者自五臺山歸惠然見過曰昔公守桂林嘗與論衡嶽山水之秀爲湖嶺勝絕今惟深自黨入相州至林慮過天平山尋幽窮勝縱觀泉石過衡嶽遠甚予矍然曰予從先御史居湯陰二年湯陰與林慮接境平居未嘗有言者今師詔我是將以我爲魏人而且欲佞予邪越明日惟深告辭予因畱惟深同游以賞前言初自馬嶺入龍山小徑崎嶇又數里入龍口谷山色回合林木蒼翠遶觀俯覽遂忘筆轡之勞翊日飯林慮亭午抵桃林村乃山麓也泉聲夾道恠石奇花不可勝數山回轉平地數尋曰槐林坐石弄泉不覺日將晡憇環翠亭四顧氣象瀟灑恍然疑在物外畱連徐步薄暮至明教院夜宿連雲閣明旦惟深約寺僧契圓從予游東過通勝橋至於龍洞又至菩薩洞下而南觀長老巖水簾亭同行崖徑下瞰白龍而歸翊日西游長老菴上觀珍珠泉穿舞獸石休於道者菴下至於忘歸橋由澗而轉至於崑閬溪仙人獻花臺出九曲灘南會于白龍潭捫蘿西山沿候樵徑望風雲谷而歸明日契圓煮黃精蒼朮

苗請予飯于佛殿之北回望峰巒秀若圍屏契圓曰居良而首出者倚  
屏峯也予曰諸大峰率如圍屏何獨此峯得名契圓曰大峰之名有六  
小峯之名有五皆先師之傳又其西二峯一曰紫霄峯上有秀士壁其  
次曰羅漢峰上有居士壁以其所肖得名也又六峰之外其南隱然者  
土民呼爲撲猪嶺又其次曰熨斗峰諸峰皆於茂林喬松間拔出石壁  
數千尺回還連接巖峭翠雖善工不可圖畫予留觀凡五日不欲去  
始知惟深之言不妄又嗟數年之間居處相去方百里之遠絕勝之景  
耳所不聞對惟深誠有愧色

**明李夢陽游蘇門山記**

予當正德戊辰值春仲之交而游輝縣於是覽蘇

門之山峰觀于衛源乃登盤山至侯趙之川遂覽于三湖返焉李子登  
蘇門之山扣石而歌歌曰泉水活活北之流矣有女懷春采彼薇矣山  
雪修阻暮予何之矣歌竟長嘯響應林谷時人莫測也蘇門山古士率  
棲焉著者魏阮籍晉孫登宋李之才邵雍元許衡姚樞耳然諸皆有祠  
祠之獨籍不祠也蘇門有九峰山亦奇絕然其上無泉侯趙川亦無川

可恨也太行山至蘇門峰萬餘數森森若排劍北寺中有三峰獨奇可  
三寺各當一奇有一泉繞之流乃其泉數里觸大石輒入地故不至侯  
趙川予觀三湖之險蓋虎豹之窟而魑魅所宅也西踞壺關之魏北跨  
陵川之危東扼林慮上黨有盜賊恒數百騎來則鼓弓弩持刀出沒林  
阻巖谷間號曰青羊白戈云而盤山路石岬岬嶮嶮行若登天然過此  
豁然曠川而四面皆山所謂侯趙川也蓋若桃源焉三湖有巨竹蒼茂  
登山西望亭亭綠崖而綠者竹也中湖則有石鏡半規耳而默堂能鑒  
天日山河人物焉豈不異哉中湖寺趙宋號太平興國寺屬湯陰縣南  
北湖寺則今人創之耳遶寺磽田以千數然故櫟橡碓磊區耳於是寺  
僧招流人墾之租其人率斬茅菅阻巖崦爲聚落煙火裊裊相雜也其  
流人若婦并爲寺僧使乃其婦則於邊寺泉任載水予自南湖還也乃  
見兩三婦置桶巖滴而猥坐其下然青羊白戈過其聚落聚落人輒飲  
食之得無害青羊白戈感其飲食數亦輒贈遺之爲常焉輝縣產魚稻  
然其人多病瘦借予行者左國玉左國玉予內弟也內弟生不識山前

出陽武行望見山喜以爲雲已知其山也益又喜躍馬行懊不卽至山  
李子曰余游蘇門蓋得於山川土俗之別云於是作記

**唐李德裕平泉山居記**經始平泉追先志也吾隨侍先太師忠公在外

十四年上會稽探禹穴歷楚澤登巫山游沅湘望衡嶠先公每維舟清  
眺意有所感必凄然遐想屬目伊川嘗賦詩曰龍門南岳盡伊源草樹  
人煙目所存正是北州梨棗熟夢魂秋日到郊園吾心感是詩有退居  
伊洛之志前守金陵於龍門之西得喬處士天寶末避地遠游爲荒榛  
首陽翠微尚有薇蕨山陽舊徑唯餘竹木吾乃剪荆莽毆狐狸如立斑  
生之宅漸成應叟之地又得

**珍木奇石列於庭際平生素懷於此**

足矣吾嘗以出處者貴得其道進退者貴不失時古來賢達多有遺恨  
至於玄祖潛身於柱史柳惠養德於士師漢代丙曼容官不過六百石  
終無辱始邈難及矣越蠡激牛以肥遁留侯託黃老以辭世亦其次焉  
范唯感慕下澤一語始然高謙鄧禹見功臣多賦委遠名勢又其次也  
吾者葵無備足之知處鴈有不鳴之患雖有泉石亦無歸期留此  
林居貽厥後代鬻平泉者非吾子孫也以平泉一樹一石與人者非佳

子弟也吾百年後爲權勢所奪則以先人所命泣而告之此吾志也詩  
曰維桑與梓必恭敬止言其父所植也昔周人之思召伯愛其所憩之  
樹近代薛令君於禁省中見先祖所據之石必泫然流涕汝曹可不慕  
之唯岸爲谷谷爲陵然後已焉可也

**宋司馬光獨樂園記**熙寧四年迂叟始如洛六年買田二十畝於尊賢

坊北隅以爲園其中爲堂聚書五千卷命之曰讀書堂堂南有屋一區  
引水北流貫宇下中央爲沼方深各三尺疏水爲五派注沼中狀若虎  
爪自北旋流出北階懸注庭下狀若象鼻自是分爲二渠繞庭四隅會  
西北而出命之曰弄水軒堂北爲沼中央有島島上植樹圍周三丈狀  
若玉玦攬結其狀如漁人之廬命之曰釣魚菴沼北橫屋六楹厚其墉  
茨以禦烈日開戶東出南北列軒牖以延涼颺前後多植美竹爲清暑  
之所命之曰種竹齋沼東治地爲百有二十畦雜蒔草藥辨其名物而  
揭之畦北植竹方徑丈狀若棋局屈其抄交相掩以爲屋植竹於其前  
夾道如步廊皆以蔓藥覆之四周植木藥爲藩援命之曰採藥圃圃南

爲六欄芍藥牡丹雜花各居其二每種止植兩本識其名狀而已不求多也欄北爲亭命之曰澆花亭洛城距山不遠而林薄茂密常若不得見乃於園中築臺作屋其上以望萬安轅轅至於太室命之曰見山臺迺叟平昔多處堂中讀書上師聖人下友羣賢窺仁義之原探禮樂之緒自未始有形之先暨四達無窮之外事物之理舉集目前所病者學之未至六又何求於人何待於外哉意倦體疲則投竿取魚執衽採藥決渠灌花操斧剖竹濯熱盥手臨高聳目逍遙徜徉唯意所適明月時至清風自來行無所愧耳目肺腸悉爲已有踽踽洋洋焉不知天壤之間復有何樂可以代此也因合而命之曰獨樂園

宋歐陽修叢翠亭記

九州皆有名山以爲鎮而洛陽天下中周營漢都

自古以王者制度臨四方宜其山川之勢雄深偉麗以壯萬邦之所瞻由都城而南以東山之近者闕塞萬安轅轅緱氏以連嵩室首尾盤屈踰百里從城中因高以望之衆山靡迤或見或否惟嵩最遠最獨出其嶄巖聳秀拔立諸峰上而不可掩蔽蓋其名在祀典與四嶽俱備天子

巡狩望祭其秩甚尊則其高大殊傑當然城中可以望而見若巡檢署之居洛北者爲尤高巡檢使內殿崇班李君始入其署卽相其西南隅而增築之治亭於上敞其南北嚮以望焉見山之連者峰者岫者絡繹聯亘卑相附高相摩亭然起淬然止來而向去而背頽崖恠壑若奔若蹲若鬪若倚世所傳高陽三十六峯者皆可以坐而數之因取其蒼翠叢列之好遂以叢翠名其亭亭成李君與賓客以酒食登而落之其古所謂居高明而遠眺望者歟

宋晁補之照碧堂記

去都而東順流千里皆桑麻平野無山林登覽之

勝然放舟通津門不再宿至於宋其城郭闌閑人民之庶百貨旁午以視他州則浩穰亦都也而道都來者則固已曠然見其爲寬閑之土而樂之初補之以校理佐淮南公從宴湖上後謫官於宋登堂必慨然懷公拊檻極目天垂野盡意若遐鷺大空者花明草薰百物媵媚湖光彌漫飛射堂棟長夏畏日坐見風雨自堤而來水波紛粧柳搖而荷靡鷗鳥盡僂客顧而嬉翛然不能去蓋不獨道都來者以爲勝雖屢於吳楚



登覽之樂者度淮而北則不復有至此亦躊躇懷徯而喜矣

明楊一武西園圖記西園者宋駙馬都尉王詵晉卿延東坡諸名

勝燕遊之所也當時李伯時寫爲圖後之臨寫者或著色或用水墨不一法此圖用水墨清韻灑灑可愛燕集歲月無所考西園亦莫究何在卽圖而觀雲林泉石儵然勝處也有礪源遠且厚紆折奔放而下礪左右巨石連延峭拔有壁立數十丈如削有方整如屏立橫礪石梁平廣若砥瀕礪地夷曠有古松五株檜一株崇者勢凌雲際斜者若倚蓋皆蒼翠蒼鬱類含霧者而檜根迸露斜出類猛獸狀林木森然扶疎蕭爽可數蕉一本生意暢茂儒衣冠十有四人僧道士各一人坐松下憑按伸紙握筆而書者東坡居士對竚而觀者晉卿側立居士之右張文潛傍坐而俛觀者蔡天啓別據按展卷畫陶淵明歸去來圖者李伯時傍坐憑按而觀者子由持蕉筴立子由之右黃魯直立魯直之右陳無已立伯時之後而按膝頰視者李端叔坐伯時之右就按而觀者晁無咎面石壁而立濡筆欲書者米芾立米之後觀書石者王仲至趺坐石屏下論無生之旨者僧圓通袖手並坐而聽者劉巨濟坐檜根摘阮道士陳碧虛持羽扇對坐俛聽者秦少游也又有侍女二人雲英春鶯晉卿家妓也童子四人一袖手立一捧硯一持靈壽杖各隨于後一對竈淪茗其家僮也而古琴壘鼎尊勺茶具咸備嘗見熊天慵題伯時西園圖詩及黃文獻公述右堂記皆與此合文獻據鄭天民之記鄭記作於政和甲午其可徵無疑而余近見廣平侯家有劉松年臨伯時圖位置頗不同無文潛端叔無已無咎四人器物亦小異然聞後來臨伯時者如僧梵隆趙伯駒輩非一人洵更臨寫則必不能無異而於以見晉卿之好賢重文及諸君子之高風逸韻蕭散不羈光華相映如衆星之聯聚如群玉之陳列與夫從容太平之盛致蓋有曠數十世而不一見者其可爲盛也已

元王暉游霖落山記州西北四十里有山曰霖落寺曰香泉者初自寺庄入山門約行六七里峰回路轉得古浮圖亭亭出杳靄間青嶂回抱真畫圖也望東北諸峰頂歷蒼穹足注絕壑山之椒萬石林立極太湖

奇特之狀半空磊落勢若飛來蒼巖老栢儼視上下雲煙空翠顧接不暇即霖落山也行百餘步徑漸狹束石犖确不能騎青鞋竹杖推挽以進還自絕澗底陟西磴道入寺殿廢基巔崖上東西二佛龕歲月崢嶸皆開元間物南瞰哀壑心魄爲動王子與客循東崖而下抵霖落足仰看青壁斗絕如削今謂之捨身崖者是也少憩轉而升東北石磴攀蘿蹴鱗度滴乳古巖再折華嚴壁下壁磨崖爲之作隸書刻華嚴部特精緻可觀字約萬數木客誕誇時出光怪中鑿巨龕古佛護以龍象其香泉自經洞石罅中流出穿雲雷石復從乳巖半腹下瀉作瀑布沓飛濺叢石間珠跳玉迸

百折山藉以潤寺仰以清也西崖對峙老藤怪石出榭樹開蹲踞騰挐如衆獸相搏望之愕然而恐野人曰此獅子崑也其西北一峯天成如臺石逕作梯盤屈而上若雌霓掛樹連卷未收即寺之眺月臺也故址山中相傳昔魏安王起雲宮於此故宋人石刻皆引魏離宮故事有崎嶇一逕入禪扉魏主離宮在翠微之詩盛時殿閣極侈今祇禪師一殿巋然獨存所恨薄暮不獲陟連雲絕頂放曠遠

目以盡諸山之勝令人仰視飄然有整翮凌雲之志旣而風振壑寒日下山蒼然暮色自遠而至猿鳴兕叫凜然不可留遂自南山半腰歷俯落岸盤馬謹轡而還回顧寺塔暝烟四合無復所見但覺西山爽氣清潤雄秀溢我心目襟袂以之淋漓詩脾爲之清壯也

**元許有壬林慮記遊**太行之秀至吾鄉西山融結爲最幼讀書江南旣仕奔走中外雖兩歸鄉里而憂患荒迷世故縈繞望西山如天上不得至也觀郡乘載柳仲塗居蕩聞僧惟深言天平泉石過衡嶽遠甚及同游方信其言不妄益欲一游至元四年戊寅歲得請歸九月三日甲子偕監郡首公和叔始爲林慮之行午出西水門過孫平邵村時百穀已收芋區蔬圃碁錯星布柿林如江南橘黃時遠近蔽虧歷流寺固縣大風揚塵俄幸止孝親寺僧永冶士大夫暨巡徼監當官聞來迂晚宿寺中僧西溪年八十八尚能款客明日夙興拜韓公墳讀富鄭公所撰碑碑有亭故無損石極美碑陰有樹如水墨所畫墳皆甃甃完者尚多兵荒中有僧紀公奮身捍蔽卒賴其力宅兆形勢風水家圖以爲式以爲

天地間不多見者憑高歷覽又登寺西南經閣果極其妙高下陰顯與圖所傳不異也顧豐安兆域寺燬于兵僧徒解散豪右斬木堊人盜甃殘毀殆盡則紀之功可念也小酌遂行林州知州李祐之延同知梁思誠仲信判官張仕謙子信迂于諸翟晚至州宿萬安寺丙寅謁廟學遊黃華山和叔送予出郭北門歸祭其故人同知梁仲信諸生李冕咬咬侍行十餘里至其麓皆小石榭櫛是日大霜水皆冰人謂地高寒較他地早一月榭葉青紅可愛路漸高聞水聲于灌叢亂石中又數里山益高峰益峻壁益峭澗益深路益險水聲益大峰回路轉掩抱重疊使人應接不暇澗皆盤石高下爲磴級泉流其上懸而爲練激而爲湍飛花旋碧喧豗飄洒其渚而爲泓者清澈如空纖芥可見寺相近屏幃益竒亂石不可騎過盤石道左有水磴作屋其上自麓又十里至寺石柱刻張商英絕句詩言高歡避暑事基字韻叶來字註切其下他柱多題刻漫滅不可盡讀大率多崇觀間人少憇遂入山觀水簾一僧前導山民十餘輩持斧鐮剪榴鬚掇碎石僅能投足馬不負人且不能登陟人力憊極

又據鞍不跬步又下若是者逾三里許遂不可騎矣始見懸瀑如練於半天騎留林石間相率牽擁而登焉峻坂微徑亂石犖确如梯而無級樛木交錯攀蘿挽條尺寸而進賴健卒曳絙于前挽之而登因思東漢封禪記所載登泰山事此近似焉問僧至否以僧言遠近爲喜畏又三里許始至有石突出如屏四向無所連着其高入雲所謂挂鏡臺也前有磐石疲甚坐其上從者齎酒脯至仲信年六十餘矣懼其不任登陟留之寺中俄亦躡躡以兩卒掖而至又迷路枉里許石上望水簾北崖者僅如匹練下濺崖飛白始闊其西者崖上垂白亦不過丈許意謂昔人傳誇過實俄從卒持二冰柱長五尺許以獻云至簾下得之且盛言其偉遂欲卽之發火煮酒引滿數爵諸生暨從者遍飲之乃緣南崖微徑迤邐而西而北坡極陡峻草石皆冰滑不可投足尺寸展移栗栗危甚乃至西崖下水簾內仰面望之目力爲窮始見崖上之水飛灑散布疎密勻整自崖而下至澗底其長不知幾百丈其闊百餘尺光明透澈去人尚五丈許真所謂迸珠簾者也負崖坐石久之仲信又踞踏以酒

至爲引數爵力稍蘇攀援而北仲信不能從也獨遣其卒挈酒以從轉折而東至北崖簾下有崑坐數十人簾之長又過於西者東邊則頗濃厚自巔至地時如團雪投墜而散連屬不斷加以動搖飛舞如玉龍蜿蜒狀餘皆與西簾同兩簾皆清氣襲人時時飛灑如細雪着人面信天下之奇觀也簾下沾灑細草皆爲清水日夕凝積或聳直如玉筍或扶踈如珊瑚蔽崖彌澗奇形異狀不可殫記瓊田瑤草殆此謂也西崖下望挂鏡臺則培塿矣此山之形奇峰重疊如展畫屏不知高挂鏡臺又幾百周圍環抱而開豁其東臺如門屏而位置偏南臺前之山一遮一掩又不知幾百重也始坐磐石疑水簾之小蓋遼遠空闊掩映崖石淡然而無加以老目茫茫故也北簾之東又有懸瀑望之差小青壁無路不能即觀久之循來跡而歸石間多蘭臺<sub>上</sub>墜于下者皆爲水波龍鱗之狀方平可愛與仲信輩罄酒殺而歸歸途趨下差覺易僧醉喜甚捧冰如珊瑚者前行至繫馬所且乘且步俄至寺前就磐石列壺觴以坐又以紅樹及山果之如丹砂者與僧所持冰列于前清泉冷冷過壺觴

間且漱且盥且觴且誅非迫於暮不忍歸也和叔率州官載酒迂於郭至寺以所携水簾泉淪茗飲之丁卯之延子敬同至墨竈山寺殿東楹壁有梅軒佚老真元癸酉歲所題文字皆奇其下殘缺石柱多宋人題名緣石磴登方丈鳴箏小酌從者得雉爲炙以侑觴題詩于東壁而出至淇峪東二里餘支提龕琢石崖爲之有開元十九年蔡景所撰碑刻甚精寺前流泉恠石不減黃華寺有巨槐蔭地數畝山門有白松皮葉皆異磚塔嵌張商英聖燈石刻聖燈寺在西北峯絕頂望之隱隱見其殿字僧云蓋四十里之遙舊傳聖燈誠懃拜禱則見商英而後見者多自矜必刻石以紀近年元遺山亦有詩紀之和叔云某官甚不叶人望亦嘗禱而見之余服其言清泉灑灑循殿階而流歷石磴至方丈望五松亭方丈西有磐石坐於是得山尤佳午和叔治具張樂夜分始休夢回泉聲滿耳可以消酒戊辰早浴于寺之浴室題名白松刻石後殿石柱之延子敬歸和叔入浴余獨乘月登陟坐松下磐石僧有普靜者善鬻菓終日獻藝至是又率其徒按羯鼓笙笛鏗鐃交奏迭作於月明松

影中清風颯然山鳴谷應不知此身之在人世也長老勝祥又進數尊而後歸寢昔歐謝諸公游嵩山見石室汪僧叩厥至論余之游乃得此輩可爲一笑然亦陶寫終日正自不惡此山秀拔在黃華之右至於水簾之奇偉與夫遮掩環抱重疊深遠則不及也二山之泉皆去山數里沃入地中已已將遊栖霞和叔謂其地無大奇計程欲以九日登鳳寧山遂不果往東迴過諸翟翟曲宿下洹庚午至鳳寧山山在洹水之陰峭峻奇秀望之如鳳聳石爲兩翼上有亭其巔又爲亭亭上爲屋兩重墉三聖女其上有金泰和間碑載乞石烈氏所建三女則不能究其氏族也山多古栢路甚險登之甚勞旣至其巔則俯瞰二亭若井底坐久風急始徹俎而下過南齋觀丈八佛大磚浮屠貯佛其中有紹聖間石刻過槎牙巔至善應宿儲祥宮宮有洞房以甃爲之辛未登西樓和元裕之詩遣捕魚得鯉鯽活躍几席前午泛舟觀泉於宮之西泉皆洹之狀流而突出石崖下騰湧有歷下所謂趵突者清澈尤甚土人疏導作堰以激磴礪爲利甚大登龍祠祠下泉出尤怒日已暮宿于宮中壬申道人擊雲璈俯觴方盤桓殿廡求盜二人報大尹杜公率其屬迓二日不得已遂歸往返九日游歷四百里山中憇息則有從者絃歌之娛馬上疲倦則聽和叔劇論可以醒塵思遣睡魔餘力所及得詩凡三十四首姑錄之以記歲月所不足者天平柳公仲塗所游西山最勝者和叔謂其地險甚且路經大雨不行栖霞又尼于猶豫而王泉澤陽諸山皆有可觀未得歷至尚有待於他日

**明薛正言登嵩山記** 永樂二年正月與都督扶風馬公同至嵩山神祠

登草叅亭整衣冠盥悅以入至中門道士二人出肅進至祠堦拜謁畢步出兩廡觀歷代封祀碑遂至登封官舍宿焉早起出縣治北涉澗壑披荆棘行八九里望玉鏡峰甚奇往觀啓母石右傍舊有啓母神祠祠已燬故基石具在斷碑四五卧荆榛中字磨滅不可考過啓母神祠西十數步是爲崇福宮宮宇亦已廢廢基上一平丘甚高褰衣而上乃得故堂基中有流觴曲水渠皆鑿石爲之渠圓而正周坐可十數人蓋昔遊觀者宴飲之所東有一穴泉甚清流于渠中今泉竭不復出矣循

山西行約三二里一峰巍然而南漢武帝登封時神人呼萬歲之所峰之半乃昔嵩陽觀故基有唐天寶年碑東古栢五株積翠婆娑可愛中有一株尤大命從者五人聯手抱之圍始合樹下一石刻曰漢武帝封大將軍餘栢或三四抱圍所植皆歷千百年者衆咸坐玩不忍去又登十餘里至法王寺寺有殿堂可延坐一老僧出謁龐眉古貌鬚髯蒼然僊如也衆皆解衣憇息談味眺望無不適意良久登天門峰峰極峻旣登東瞻月峽西觀少室南望南陽許汝諸山皆出沒在千百里外空日澄明端倪無際曠焉茫焉不知天之爲高地之爲下而登陟出於灝氣之上也夫嵩山據天地之中崇峻而端直磅礴而方廣得坤道直方大之體諸峰起伏於上二十有四備天運四時之數造化蘊蓄如此豈高廣足以盡崧山之觀哉相與緩步緣峰而下至岳麓寺峰而西至會善戒壇以望永泰四寺峰巒之勝皆不及法王所見高廣矣時日已昃聯轡往少林寺西出山麓夾道叢木交蔽重峰疊巘獻奇後先令人應接不暇近寺一里許寺僧數人來迎湏臾鼓鍾聲自嵐翠中出樓殿金碧

掩映林巒間與夕陽同輝夫不登法王寺峰無以見嵩山之高廣不登少林寺峰無以見嵩山之幽奇登覽之勝無以踰於此矣入寺晚鉢畢寺僧導登五乳峰觀達磨面壁洞洞前有受記亭設達磨神光受記像近塔古栢一株甚翠僧曰此栢六祖慧能所植香案上一石長二尺許僧曰石中有達磨背坐影像乃面壁時精神所寓者余觀其石乃湍激之石非壁石之石形像若人爲之者衆令從者抱石置前以水石磨之影像如故衆愈神其異余因解之曰昔梁魏之時南北奉佛者率以崇飾塔廟爲事糜費生人故達磨西來不立文字見性成佛蓋示人以靜也當時人鮮悟曉面壁九年而去豈區區寓精神於一石以示神異於後世哉是夜宿少林寺方丈明日出轍轅關都督公道語余曰吾年纔弱冠卽領戎事泝大江上三峽崎嶇巴蜀間凡山之奇異者靡不周覽及出守張掖陟關陝越鄠鄠周旋乎上郡祁連之廣月氏之高靡不遍歷然巴蜀之山偏於奇峭張掖之山苦於荒遠求夫具天地清淑之氣得中正之體者惟嵩山爲然吾思之歷年而今始得與諸公登覽以遂

其平生企慕之懷豈非幸歟因并記之

**明董廷珪衛源遊覽記**

天順庚辰秋九月自汴之衛抵輝邑山水明媚

元元豐樂聞有衛源廟者肇於隋宋慶曆間撤新之廟之神世以王爵  
主水利歲時致祭又山曰蘇門水曰百泉亦奇觀也乃齋辦香從數騎  
出西門五里所造其廟果宋舊貫規畫不類常廟前聞人之經遊者代  
有石刻東有老子石洞西有邵康節安樂窩誠古跡也然其勝壯則在  
百泉之一水焉詩曰苾彼泉水亦流於淇百泉是已泉分道出廟前之  
石隙中瀦而爲池池中有亭曰百泉曰湧金蘇文忠公親爲題扁跨石  
梁通之蓋覽勝之所典儀者導吾登眺其上從者皆儒流時霽景開明  
商飈不作秋水長天一碧萬頃心甚樂之因凭欄縱觀泉珠之躍方其  
洶湧水底累累然穿層碧而起類若萬斛之珠噴諸淵海及夫跳躍波  
爲日光所射又如百鍊之金沸諸爐冶若此者滿池皆然溶漾可愛水  
鏡澄空細分妍醜芹泮中溼蒼可掬沙鷗錦鱗往來不驚而畫舫清樽  
惟意所欲覽者如出塵境而立水壺耶已而信步亭中閱東坡筆跡鸞  
翔鳳翥獨步今古亭之四壁皆所刻古今名賢遊覽題詠喜而遍誦之  
金石交作又天然雅奏也已而夕陽嶠山林影墮地乃賦律詩二章以  
酬清玩識諸亭而歸

古今游名山記卷之六

終





